

傷寒家秘的本言



傷寒瑣言

陶華述

叢書集成初編

(補印本)

傷寒瑣言及其他一種

一九三九年十二月初版
一九六〇年一月補印

陶 華 述

商務印書館出版

上海市印刷六廠印刷

傷寒瑣言序

醫之爲道。何道也。曰。君子之道也。苟非存心有恆者。可輕議哉。何則。夫藥之性。能生人。亦能殺人。蓋操之不得其要。則反生爲殺矣。惟君子則然。心不苟。故其爲業必精。及其臨病。必詳以審。故能化悲痛爲歡忻。小人之性。忍以貪。貪則惟利是圖。忍則輕忽視人命。逮及臨病。則誇以略。不察病之虛實。輒投瞑眩之藥。不殺人也幾希。吾固爲君子之道也。予晚年得子。方逾弱冠。柔軟多病。習懶不能自強。必非能受此道者。日夜痛心。懼夫吾歿之後。有病委之庸醫。足可以傷生滅性。孟子云。不孝有三。無後爲大。有子多病。不傳以濟生之道。一旦夭扎。祖宗之祀事絕矣。豈爲人父之道哉。某今年七十有七。衰邁殊甚。桑榆之日。豈能久照。日夜用心。以緝成傷寒明理續編。論法雖略備。非有師承口訣。不能融會貫通于心。又著瑣言一卷。文雖鄙俚。然言簡意到。其中包括仲景不傳之妙。皆世所未嘗聞見。剖露肺肝。以罄其蘊奧。實升高之梯階。當寶之如珠玉。潛心玩繹。搜索以盡厥旨。有疑輒問。不可因循。務期日進高遠。司馬溫公曰。達則爲良相。不達則爲良醫。豈非君子之道乎。汝宜服膺此訓。敬慎而行之。他日倘能以斯道濟人。亦君子也。若存心不古。以吾言爲妄謬。反以斯道殺人。負吾之用心。非吾之子也。

傷寒瑣言

辯張仲景傷寒論

明 餘杭節菴陶 華述

客有過予而問之曰。甚矣。傷寒之深奧。桂枝麻黃二湯之難用也。服之而愈者。纔一二。不愈而變重者。嘗八九。仲景立法之大賢也。何其方之難憑。有如此哉。今人畏而不用。以參蘇飲和解散等。平和之劑而代之。然亦未見其妙也。子盍與我言之。予曰。吁。難言也。請以經語證之。經曰。冬氣嚴寒。萬類潛藏。君子固密。則不傷於寒。觸冒之者。乃名傷寒耳。其傷於四時。皆能爲病。以傷寒爲毒者。以其最成殺厲之氣也。中而卽病。名曰傷寒。不卽病者。其寒毒藏於肌膚。至春變爲溫病。至夏變爲暑病。暑病者。熱氣重於溫也。以此言之。傷寒者。乃冬時感寒卽病之寒。桂枝麻黃二湯爲當時之傷寒設。與過時之溫暑者。有何預焉。夫受病之原則同。亦可均謂之傷寒。所發之時既異。治之則不可混也。請略陳之。夫春溫夏熱秋涼冬寒者。四時之正氣也。以成生長收藏之用。風亦因四時之氣。而成溫涼寒熱也。若氣候嚴寒。風亦凜冽。天道和煦。風亦溫暖。冬時坎水用事。天令閉藏。水冰地凍。風與寒相因而成殺厲之氣。人觸冒之。腠理鬱塞。乃有惡風惡寒之證。其餘時月則無此證也。仲景固知傷寒乃冬時殺厲之氣所成。非比他病可緩。故其爲言特詳於此書。而略於雜病也。倘能因名以求其實。則思過半矣。不幸此書傳世久遠。遺帙頗多。晉太醫令王叔和得於散亡之餘。詮次流傳。其功博矣。惜乎以己論混經。未免穿鑿附會。成無己氏因之順文註釋。並

無缺疑正誤之言。以致將冬時傷寒之方。通解溫者。遺禍至今而未已也。溫暑必別有方。今皆失而無徵也。我朝宋景濂學士。嘗嘆傷寒論非全書。得其旨哉。蓋傷寒之初中人。必先入表。表者何。卽足太陽寒水之經。此經行身之後。自頭貫脊。乃有頭疼脊強惡寒之證。在他經則無此證矣。況此經乃一身之綱維。爲諸陽之主氣。猶四通八達之衢。治之一差。其變有不可勝言者矣。故宜此二湯發散。表中寒邪。經曰。辛甘發散爲陽者是也。若以此湯通治春溫夏熱之病。則誤之甚矣。曰。傷寒發於冬時。已聞命矣。邪之在表。爲太陽經也。一經而有二藥之分。又何耶。曰。在經雖一。然則有榮衛之分焉。寒則傷榮。證乃惡寒發熱而無汗。脈浮緊。蓋浮爲在表。緊爲惡寒。有寒則見無寒則不見也。常用麻黃湯輕揚之劑。發而去之。寒邪退而汗出。表和而愈矣。曰。緊脈固爲寒矣。脈之緩者。亦用桂枝湯。又何耶。曰。風則傷衛。傷衛則自汗。緣太陽受風。不能衛護。腠理疎而汗泄。所以脈見浮緩也。脈雖浮緩。其受寒則一。故亦宜桂枝辛溫之藥。解散寒邪。腠理閉而汗止。表和而愈。又有榮衛俱傷者。二湯又難用也。故復設大青龍湯。然此藥難用。非庸俗得而識也。曰。溫暑旣無方法。治之則將奈何。脈證與傷寒有何分別。曰。溫暑雖殊。亦冬時感受寒邪而不卽散。在人身中。伏藏歷二三時之久。天道大變。寒化爲熱。人在氣交之中。亦隨天地之氣而化。觀仲景以卽病之傷寒與溫暑時令爲病之名。豈無異哉。治之方。亦必隨時。以用辛涼苦寒矣。安得概用冬時治寒辛溫之方乎。今無其方者。蓋散亡之也。經旣稱變爲溫。變爲熱。則已改易冬時之寒爲溫熱矣。方亦不容不隨時改更也。夫溫病欲出。值天時和煦。自內達表。脈反見於右關。不浮緊而微數。曰。惡寒否乎。曰。傷寒自

冬月風寒而成。外則有惡寒惡風之證。既名爲溫。則無此證矣。曰。然則子之言。何所據乎。曰。據乎經耳。經曰。太陽病發熱不惡寒而渴者。溫病也。不惡寒。則病非因外來。渴。則明其自內達表。曰。春夏之病。亦有頭疼惡寒。脈浮緊者。何也。曰。此非冬時所受之寒。乃冒非時暴寒之氣耳。或溫暑將發。又受暴寒。雖有惡寒。脈浮之證。未若冬時之甚也。宜辛涼之藥。通其內外而解之。斷不可用桂枝之劑矣。曰。溫熱與傷寒。治之不同。既聞命矣。敢問傷寒之在三陽。則爲熱邪。既傳三陰。則爲陰證矣。法以熱治。固其宜也。三陰篇以四逆散涼藥。以治四逆。大承氣湯。以治少陰。其故又何耶。嗚呼。此蓋叔和以殘缺之經。作全書詮次。將傳經陰證與直中陰經之陰證。混同立論。所以遺禍至今而未已也。姑略陳之。蓋風寒之初。中人也無常。或入於陰。或入於陽。皆無定體。非但始太陽終厥陰也。或自太陽始。日傳一經。六日至厥陰。邪氣衰。不傳而愈者。亦有不能再傳者。或有間經而傳者。或有傳至二三經而止者。或有終始只在一經者。或有越經而傳者。或有初入太陽。不作鬱熱。便入少陰而成真陰證者。或有直中陰經而成寒證者。緣經無明文。後人有妄治之失。若夫自三陽傳次三陰之陰證。外雖有厥逆。內則熱邪耳。若不發熱。四肢便厥冷。而惡寒者。此則直中陰經之寒證也。自叔和立說之混。使後人蒙害者夥矣。夫太陽受邪。行盡三陽氣分。傳次三陰血分。則熱入深矣。熱入既深。表雖厥冷。真熱邪也。經云。亢則害。承乃制。熱極反兼寒化也。若先熱後厥逆者。傳經之陰證也。經云。厥深熱亦深。厥微熱亦微。是也。故宜四逆散。承氣湯。看微甚而治之。如其初病便厥。但寒無熱。此則直中陰經之寒證也。急宜四逆輩以溫之。經云。發熱惡寒者。發於陽也。無熱惡寒者。發於

陰也。尙何疑哉。又有日傳二經爲兩感者。傳經未終而斃矣。病有標本。治有逆從。豈可概論之乎。曰。陰證之不同。已聞命矣。嘗讀劉守真書云。傷寒無陰證。人傷於寒。則爲熱病。熱病乃汗病也。造化汗液。皆陽氣也。徧考內經。靈樞諸篇。並無寒證。陰證乃雜病也。叔和誤入之耳。守真高明之士。亦私淑仲景者。而議論之異。又何耶。曰。雖守真之明達。蓋亦因傷寒論以桂枝麻黃湯通治寒暑之誤。而有是說。故叮嚀云。天道溫熱之時。用桂枝湯。必加涼藥於其中。免致黃生斑出之患。若知此湯自與冬時卽病之傷寒設。不與過時之溫暑設。則無此論矣。觀其晚年悟道。著病機氣宜保命集。其中羌活湯辛涼之藥。以治非時傷寒。其妙如神。足可補仲景之遺亡。何其高哉。夫內經言。傷寒卽爲熱病。而無寒者。語其常也。仲景之論。有寒有熱者。言其變也。合常與變。而無遺者也。所謂道並行而不悖。而反相爲用也。此其所以爲醫家萬世之準繩標的也歟。客唯而退。遂請著其說于右云。

治傷寒用藥大略

凡證有頭疼惡寒。皆是傷寒。無則皆否也。何則。蓋傷寒則惡寒。傷食則惡食。理固然也。但在冬時惡寒爲甚。蓋冬時爲正傷寒。天氣嚴凝。風寒猛烈。觸冒之者。惡寒殊甚。其餘時月。雖有惡寒。亦微。未若冬時之惡寒爲甚也。雖四時皆有傷寒。治之不可一概論也。冬時氣寒。腠理微密。非辛甘溫不可。故以桂枝等湯以治之。然風與寒常相因。寒則傷榮。惡寒頭痛。脈浮緊而無汗。則用麻黃湯。開發腠理以散邪。得汗卽愈。風則傷衛。頭痛惡風。脈浮緩而自汗。則用桂枝湯。充塞腠理以散邪。汗止卽愈。經云。辛甘發散爲陽者。是也。

若夫榮衛俱傷。又非此二湯所以治也。須大青龍湯。然此湯大峻。又非庸俗所可擬也。予亦有代之者。蓋冬時爲正傷寒。天氣嚴凝。風寒猛烈。觸冒之者。必宜用辛溫散之。其非冬時亦有惡寒頭疼之證。皆宜辛涼之劑。通表裏。和之則愈矣。若以冬時所用桂枝辛溫之藥。通治之。則殺人多矣。曰辛涼者何。羌活沖和湯是也。兼能代大青龍湯爲至穩。嗚呼。一方可代三方。危嶮之藥。如坦夷。其神乎。但庸俗輩所未知也。過此則少陽陽明二經。在乎半表半裏肌肉之間。脈亦不浮不沉。外證在陽明。則有目疼鼻乾。不得眠之證。脈似洪而長。以葛根湯。解肌湯。升麻湯之類治之。在少陽則胸脅痛而耳聾。脈見弦數。以小柴胡湯加減而和之。本方有加減法。此二經不從標本。從乎中治。余嘗以小柴胡湯加葛根芍藥。治少陽陽明合病如拾芥。但不使世俗知此奇妙耳。過此不已。則傳陽明之本爲入裏。大便作實。其外證悉能。謂無頭痛惡寒也。脈見沉實不浮。證語惡寒。六七日不大便。口燥咽乾而渴。輕則大柴胡湯。重則三乙承氣湯。選用。或曰邪既入裏而作實。無非大黃苦寒之藥。除下之。何其用方之雜選也。余曰。傳來非一治之乃殊耳。病有三焦俱傷者。則痞滿燥實俱全矣。則宜大承氣湯。厚朴苦溫以去痞。枳實苦寒以泄滿。芒硝鹹寒以潤燥。軟堅。大黃苦寒以泄實去熱。病斯愈矣。且在中焦則有燥實堅三證。故用調胃承氣湯。以甘草和中。芒硝燥潤。大黃泄實。不用枳實厚朴。以傷上焦。虛無氤氳輕清之元氣。調胃之名。於此立矣。上焦受傷。則爲痞實。用小承氣湯。枳實厚朴除痞。大黃以泄實。去芒硝。則不傷下焦血分之真陰。謂不伐其根也。若夫大柴胡湯。則有表邪尙未除。而裏證又急。不得不下。只得以此湯通表裏而緩治之。猶有老弱及血氣兩虛之人不宜用。

此三陽之邪在裏爲患。春夏秋有不頭痛惡寒而反渴者。此則溫病也。暑病亦然。比之溫病猶加熱也。治宜加減小柴胡湯。蓋此湯春可治溫。夏宜治暑。秋能潤肺。又宜升麻葛根湯。解肌湯。敗毒散。中暑而渴者。小柴胡石膏湯。人參白虎湯。看渴微甚而用之。無不效。經曰。發熱不惡寒而渴者。溫病也。若夫陰證則別有法。不在此例矣。

傷寒言證不言病

夫傷寒言證不言病者。厥有旨哉。證之一字。有明證。見證。對證。之義存焉。如婦以證姦。賊以證盜。刃以證殺。不容辭而無所逃其情矣。且人之心肝脾肺腎。在人身中。藏而不見者。若夫口鼻耳目。則露而共見者也。五臟受病人焉能知之。蓋有病中。必形諸外。肝有病則目不能視。心有病則舌不能言。脾有病則口不知味。肺有病則鼻聞不香。腎有病則耳不聽聲。以此言之。則證亦親切矣。況風寒之中人。受之必有經絡部分。一或傷之。本經之證見矣。更能以脈參之。庶無差忒矣。吾故曰。傷寒言證耳。如太陽傷寒。爲表之表。其經行身之後。從頭下至足。則頭項痛。腰即強之證。見於項背也。惡寒證亦在表。蓋傷寒惡寒。傷風惡風。太陽爲寒水之經。凡見惡寒。便爲在表。最爲的當。傳至陽明之經。則不惡寒。便不宜發表。如有一毫頭痛惡寒。尙在太陽。便是表證未罷。不可攻裏。故戒曰。發表不開。不可攻裏。此事不明。殺人至速。又曰。凡嘔者不可下。經曰。嘔多雖有陽明證。不可攻。攻之爲逆。心下硬者不可下。切宜仔細。陽明經爲表之裏。其經行身之前。夾鼻絡於目。故目痛鼻乾不眠。少陽經行身之側。爲半表半裏。始於目銳眥。循脅絡於耳。交於臆。

中兩耳正中。故胸脅痛而耳聾。此三經病之易見。蓋如此。便當診脈以參之。若太陽經。則有二證。一爲傷寒。一爲傷風。脈浮緊惡寒無汗爲傷寒。脈浮爲在表。緊爲有寒。表受寒邪而未入裏。宜麻黃湯辛甘溫之劑以發之。冬用正藥。三時用羌活湯。此皆有惡寒頭痛。爲在太陽之表。尙未傳入裏。通宜發而散之。若在陽明。則脈微洪而長。按之皮膚之下。肌肉之間。此非表非裏。而爲在經。或渴用葛根湯以解肌。少陽經則脈弦數不浮。不沉在乎半表半裏之間。宜小柴胡湯以和之。有加減法。此二經者。不從標本。從乎中治也。中之下。卽肌肉之下。筋骨之間也。脈按之沉數有力。則爲熱入陽明之本。宜大柴胡湯。三承氣湯。看燥結微甚而下之。前之所云惡寒頭痛俱通治。脈不浮而沉實有力。此爲表證罷而裏證具。宜泄去其胃中實熱而愈矣。若老弱產虛。或帶表證。必須下者。皆用大柴胡湯。脈若沉遲微弱無力。則又爲陰證也。宜溫而不宜下也。謹之。

厥分寒熱辯

或曰。人之手足。乃胃土之末。凡脾胃有熱。手足必熱。脾胃有寒。手足必冷。理之常也。惟傷寒乃有厥深熱亦深。厥微熱亦微之論。何邪。曰。胃寒則手足冷。胃熱則手足熱。此病之常也。若夫極則變。不可以常道拘也。蓋亢則害。承乃制。火氣亢極。反兼水化。故有此象耳。陰陽反覆病之逆從。未可以常理論也。凡經言厥逆。厥冷。厥寒。手足寒冷等語。皆變文耳。不可以論輕重。若言四肢。則有異也。亦未可純爲寒證。若厥冷直至臂脛以上。則爲直寒無疑矣。急用姜附等藥溫之。少緩則難療矣。謂其寒上過乎肘。下過乎膝。非內有真寒達於四肢而何。然更當與脈并所兼之證參之。庶乎其無誤也。凡看傷寒。不可以厥逆便斷爲寒。必

須以脈兼證參之。方知端的。如手足厥逆。兼之以腹痛、腹滿、泄利清白、小便亦清、口不渴、惡寒戰慄、而如刀刮、皆寒證也。若腹痛後重、泄利稠粘、小便赤澀、渴而好飲、皆熱證也。宜詳審之。

傷寒用浮中沉三脈法

夫傷寒治之得其綱領。不難也。若求之多歧。則支離破碎而難矣。何謂也。脈證與理而已。予嘗以浮中沉三脈詳而治之。無所遁其情也。既云傷寒。則寒邪自外入內而傷之也。其入則有淺深次第。自表達裏。以此推之。而不難也。若夫風寒之初入。必先太陽寒水之經。此經本寒。標熱。更有惡風、惡寒、頭疼、脊強之證。寒鬱皮毛。是爲表證。若在他經。則無此證矣。脈若浮緊無汗爲傷寒。以麻黃湯發之。得汗爲解。浮緩有汗爲傷風。用桂枝湯。散邪止汗爲解。若無頭痛、惡寒。脈又不浮。此爲表裏罷而在中。中者何。表裏之間也。乃陽明少陽之分。脈不浮不沉。在乎肌肉之間。謂皮膚之下也。然亦有二焉。若微洪而長。卽陽明脈也。外證目痛、鼻乾、不得眠。用葛根湯以解肌。脈弦而數。少陽脈也。其證胸脅痛而耳聾。如見此證。此脈以小柴胡湯和之。蓋陽明少陽不從標本。從乎中治也。過此則邪入裏爲熱實。脈不浮而沉。沉則以指按至筋骨之間。方是。若脈來沉實有力。外證則不惡風寒。而反惡熱。譫語大渴。六七日不大便。明其熱入裏而腸胃燥實也。輕則大柴胡湯下之。重則三承氣湯選用。大便通而熱愈矣。若脈來沉遲無力。此爲陰證。便當看外證如何。輕則理中湯。重則姜附四逆湯以溫之。今將浮中沉三脈列圖于後。可熟玩之。

傷寒以脈大浮數動滑爲陽。沉瀼弱弦微爲陰。然脈理精深。初學未能識察。予謂傷寒之中人。由淺入深。

先自皮膚肌肉。次入腸胃筋骨。以浮中沉三脈候之。似乎無所遁乎其情矣。列爲三圖。圖下就註證治之法。則陰陽表裏易見。使因脈以知證。緣證以明治。以此達彼。由粗入精。亦可以爲初學之階梯也。欲究其至極。必須潛心熟玩仲景之書。庶幾可以入道矣。

浮

浮初排指於皮膚之上。輕手按之便得。曰浮。此脈寒邪初入足太陽經。病在表之標。可發而去之。雖然。治之則有二焉。寒傷榮。則無汗惡寒。用麻黃湯。風傷衛。則有汗惡風。用桂枝湯。一通一塞。不可同也。浮緊有力無汗。惡寒頭痛。項背強。發熱。此爲傷寒在表。宜發散。冬時用麻黃湯。餘三時皆用羌活沖和湯。有渴加石膏。知母。無渴不用加。

浮緩無力有汗。惡風頭疼。項強發熱。此爲寒風在表。冬時用桂枝湯。餘三時皆用加減沖和湯。腹痛小建中湯。痛甚桂枝加大黃湯。

中

中按至皮膚之下。肌肉之間。略重按之乃得。謂之半表半裏證也。然亦有二焉。蓋少陽陽明二經。不從標本。從乎中也。

長而有力。此爲陽明證。有頭疼。眼眶痛。鼻乾。不得眠。發熱無汗。葛根湯。解肌湯。若渴而有汗不解。或經汗過不解而渴。白虎湯。或加人參。無汗不渴。並不可服。則爲大忌。

弦而數。此爲少陽經。其證胸脅痛而耳聾。或往來寒熱而嘔。俱用小柴胡湯。加減法。若兩經合病。則脈弦而長。此湯加葛根芍藥。

沉

沉。重手按至肌肉之下。筋骨之間方得。此爲沉脈。亦有二焉。陰陽寒熱。在沉脈中分。若沉而有力。則爲陽爲熱。沉而無力。則爲陰爲寒也。

沉數有力。則爲陽明之本。表解熱入於裏。惡寒頭痛悉除。反覺惡熱。欲揭衣被。揚手擲足。譫妄狂躁。口燥咽乾。五六日不大便。輕則大柴胡湯。重則三承氣湯選用。

沉遲無力爲寒。外證無熱不渴。反怕風寒。或面上惡寒。甚如刀刮。或腹滿脹痛泄利。小便清白。或大小腹痛。皆爲陰證。輕則理中湯。重則四逆姜附湯。

傷寒至沉脈。方分陰陽。仔細體認。下藥不可造次。倘有差失。咎將歸已。凡診脈須分三部九候。每部必先浮診三候。輕輕手在皮膚之上。候脈來三動。是也。中診三候。沉診三候。三而三之。而成九候。然後知病之淺深表裏。以爲處治之標的。豈可忽略於脈。而欲求病之所在乎。明脈識證。辨名定經。得乎心而應乎手。如此而治。有枉死者。吾不信也。若脈證不明。處方無法。狂妄行醫。視人命如草芥。他日不受天殃。吾亦不信也。

傷寒傳足不傳手經辯

傷寒傳足不傳手經者。俗醫之謬論也。豈有是哉。人稟天地之氣以生。請以天地間可證者言之。盈天地至大而運行者。莫如元氣與水。且有形論之。則江河湖海溪澗溝澮。以爲行水潑水之道焉。人之充滿一身。無非血氣。亦有十二經脈。大小絡脈血海。以爲行血停血之隙道。風行水動。氣行血流。皆自然之理也。夫人之氣。自平旦會于臚中。朝行手太陰肺經。以次分布諸經。行盡周天三百六十五度。在人則行三百六十五骨節。明日寅時。復會于手太陰也。血亦隨氣流布。運行不息。榮衛一身。腠理司開闔。維持綱紀。以爲一身動靜云爲之主。所以一脈愆和。則百脈皆病。理固然而不得不然也。彼云傳足不傳手者。何所據乎。請備言其所由。蓋傷寒者。乃冬時感寒卽病之名也。冬乃坎水用事。其氣嚴寒凜冽。水冰地凍。在時則足太陽少陰正司其令。觸冒之者。則二經受病。其次則足少陽厥陰。繼冬而司春令。而亦受傷。何也。蓋風木之令。起於大寒節。正當十二月中。至春分後。方行溫令。故風寒亦能傷之。足陽明太陰中土也。與冬時無預。而亦傷之。何也。紫陽朱子曰。土無定位。無成名。無專氣。寄旺于四季。能終始萬物。則四時寒熱溫涼之氣。皆能傷之也。況表邪傳裏。必歸於脾胃。而成燥糞。用承氣湯以除去之。胃氣和矣。手之六經。主於夏秋。故不傷之。足之六經。蓋受傷之方。分境界也。若言傷足不傷手。則可以爲傳足不傳手。則不可也。況風寒之中人。先入榮衛。晝夜循環。無所不至。豈間斷於手經哉。經云。兩感於寒者。六日死。若三陰三陽五臟六腑皆受病。榮衛不行。臟腑不通。則死矣。豈虛言哉。嘗觀此事難知。曰。傷寒至五六日間。漸變神昏不語。或睡中獨語一二句。目赤唇焦。舌乾不飲水。稀粥與之則嘔。不與則不思。六脈沉數而不洪。心下不痞。

腹中不滿。大小便如常。或傳之十日以來。形如醉人。此熱傳手少陰心經也。然未知自何經而來。答曰。本太陽傷風。風爲陽邪。陽邪傷衛。陰血自燥。熱畜膀胱。壬病逆於丙。丙丁兄妹。由是傳心。心火自上而逼肺。所以神昏也。梔子黃芩黃連湯。若在丙者。導赤散。在丁者。瀉心湯。若脈浮沉俱有力者。是丙丁中俱有熱也。可導赤瀉心各半服之。宜矣。此膀胱傳丙。足傳手經也。又謂之腑傳臟也。下又傳上也。表傳裏也。壬傳丁者。乃坎傳離也。名曰經傳。氣逆而喘者。非肺經乎。如謂不然。何仲景桂枝麻黃二湯。乃心肺藥也。請試思之。

結胸解

結胸之證。嘗見俗醫。不問曾下與未下。但見心胸滿悶。便與枳桔湯。便呼爲結胸。蓋本朱奉議之說也。有頻頻與之。反成眞結胸者。殊不知結胸。乃下早而成。未曾經下者。非結胸也。乃表邪傳至胸中。未入於腑。證雖滿悶。尙爲在表。正屬少陽部分。爲半表半裏之間。只消小柴胡加枳殼以治。如未效。則以本方對小陷胸湯。一服豁然。其妙如神。祕之不與俗人言之耳。若因下早而成者。方用陷胸湯丸。分淺深從緩而治之。不宜太峻。上焦乃清道。至高之分。若過下。則傷元氣也。慎之。嘗讀仲景傷寒論結胸條云。病發於陽而反下之。熱入因作結胸。病發於陰而反下之。因作痞滿。所以成結胸者。以下太早故也。及成氏註釋曰。發熱惡寒者。發於陽也。無熱惡寒者。發於陰也。再三熟翫。不能不致疑於其間。蓋無熱惡寒者。寒邪直中陰經之眞寒證也。非陽經傳至陰經之病也。若誤下之。不死則危矣。豈可以瀉心湯寒熱相參之藥治之而

愈乎。豈反輕如結胸者乎。詳此。恐言榮衛陰陽也。風屬陽。陽邪傷衛。頭疼發熱。微盜汗出。反惡風者。當服桂枝湯。止汗散邪。醫者不達而下之。衛氣重傷。胸中結硬。經又云。結胸證脈浮大者。不可下。下之即死。結胸證悉具而煩燥者。亦死。蓋衛出上焦清道。受傷不爲不重也。故用陷胸湯峻利之藥以下之。寒爲陰。陰邪傷榮。當以麻黃湯發表。誤下之而成痞滿。宜瀉心湯以理痞。蓋榮出中焦。黃連能瀉心下之痞。邪下於膈。不犯清道。則元氣不傷。故輕於結胸耳。若陰經自中之寒。以瀉心湯理之而愈者。則吾不信也。夫以藥驗證。愚見如此。然未敢以爲必當候明哲證之。

傷寒寒熱論

趙嗣真曰。明理論云。往來寒熱者。邪正之分也。邪氣之入者。正氣不與之爭。則但熱而無寒。若邪正分爭。於是寒熱作也。蓋以寒邪爲陰。熱邪爲陽。裏分爲陰。表分爲陽。邪之客於表也。爲寒邪與陽爭。則爲寒矣。邪之入於裏也。爲熱邪與陰爭。則爲熱矣。若邪在半表半裏之間。外與陽爭而爲陰。內與陰爭而爲熱。表裏之不拘。內外之無定。由是寒熱且往且來。日有至於三五發。甚者十數發也。若以陰陽二氣相勝。陽不足則先寒後熱。陰不足則先熱後寒。此則論雜病陰陽二氣。自相乘勝然也。非可以語傷寒。斯論爲精切。深合仲景之意。蓋不唯釋疑活人書而已也。又按河間言惡寒爲寒在表。或身熱惡寒爲熱在皮膚。寒在骨髓者。皆誤也。而活人書亦以此爲表裏言之。故趙氏曰。詳仲景論。止分皮膚骨髓。而不曰表裏者。蓋以皮脈肉筋骨五者。素問以爲五臟之合。主於外而充於身者也。唯曰臟曰腑。方可言表裏。可見皮膚即骨

髓之上外部浮淺之分。骨髓卽皮膚之下內部。深沉之分。與經絡屬表。臟腑屬裏之例不同。況仲景出此例證於太陽篇首。其爲表證明矣。是知虛弱素寒之人。感邪發熱。熱邪浮淺。不勝沉寒。故外怯而欲得近衣。此所謂熱在皮膚。寒在骨髓。藥用辛溫。至於壯盛素熱之人。或酒客輩。感邪之初。寒未變熱。陰邪閉。且伏熱陰凝於外。熱畜於內。故內煩而不得近衣。此所謂寒在皮膚。熱在骨髓。藥用溫涼必矣。一發之餘。表解裏和。此仲景不言之妙。若以皮膚爲表。骨髓爲裏。則麻黃湯證骨節疼痛。其可名爲有表。復爲有裏之證耶。然仲景傷寒一書。人但知爲方家之祖。而未解作秦漢文字觀。故於大經大法之意。反有疑似。而後世賴其餘澤者。往往類輯傷寒方論。其間失其本義。及穿鑿者亦有之。矧以雜病爲論。但引其例者乎。

論傷寒少陰病發熱而反用藥不同

趙嗣真曰。詳仲景發汗湯劑。各輕重不同。如麻黃湯、桂枝湯、青龍各半越婢等湯。各有差等。至於少陽發汗二湯。雖同用麻黃附子。亦有加減輕重之別。故以加細辛爲重。加甘草爲輕。辛散甘緩之義也。其第一證。以少陰本無熱。今發熱。故曰反也。其發熱爲邪在表。而當汗。又兼脈沉屬陰。而常溫。故以附子溫經。麻黃散寒。而熱須汗解。故加細辛。是汗劑之重者。第二證。既無裏寒之可溫。又無裏熱之可下。求其所以用麻黃附子之義。則是脈亦沉。方可名曰少陰病。身亦發熱。方可行發表藥。又得之二三日。病尙淺。比之前證亦稍輕。故不重言脈證。而但曰微發汗。所以去細辛。加甘草。是汗劑之輕者。使脈不沉。身不熱。又無他證。是無病人也。又何藥焉。仲景本分作兩證。以別汗劑之輕重。活人書却與第二證中。除去無證兩字。改

作。嘗見少陰熱無陽證者。如經云。心中煩。不得眠。或咽瘡聲不出者。或欬而嘔。渴或口燥咽乾。或腹脹。不大便數證。皆是也。夫豈麻黃附子甘草湯發汗劑所可治耶。抑又有聞焉。麻黃附子細辛湯爲治少陰病之病。沉反發熱者用也。而仲景又有四逆湯治太陽病之發熱。反脈沉者。均爲之反也。仲景云。病發熱頭痛。脈反沉。若不瘥。身體疼痛者。當救其裏。宜四逆湯。此證出太陽篇。又云。少陰病始得之。反發熱。脈沉者。麻黃附子細辛湯。此證出少陰篇。切詳太陽病發熱頭痛。法當脈浮。今反沉。少陰脈沉。法當無熱。今反熱。仲景於此兩證各言反者。謂反常也。蓋太陽病脈似少陰。少陰病脈似太陽。所以謂之反。而治之當異也。今深究其旨。均是脈沉發熱。以其有頭痛。故謂太陽病。陽證當浮脈。今反不能浮者。以裏虛久寒。正氣衰微所致。又身體疼痛。故宜救裏。使正氣內強。逼邪外出。而乾姜生附子亦能出汗而解。假使裏不虛寒。則當見脈浮。而正屬太陽麻黃證也。均是脈沉發熱。以其無頭疼。故名少陰病。陰病當無熱。今反熱。寒邪在表。未傳在裏。但皮膚腠理鬱閉爲熱。如在裏無熱。故用麻黃細辛以發表。間之熱。附子以溫少陰之經。假使寒邪入裏。則外必無熱。當見吐痢厥逆等證。而正屬少陰四逆湯證也。由此觀之。表邪浮淺發熱之反。猶輕。正氣衰微脈沉之反爲重。此四逆爲劑。不爲不重於麻黃附子細辛湯也。又可見熱附配麻黃。發中有補。生附配乾姜。補中有發。仲景之旨微矣。嗟夫。常病用常法。夫誰不知。設有證變者。或脈變者。往往疑似參差。夫欲以常法例治之。惑矣。如仲景所論太陽少陰兩證。脈沉發熱雖同。而受病與用藥自別。此實證治之奇異。醫法之玄微。故併及之耳。

論傷寒兩感

趙嗣真曰。仲景論兩感爲必死之證。而復以治有先後發表攻裏之說繼之者。蓋不忍坐視。而欲覩其萬一之可活也。活人書云。宜先救裏。以四逆湯。後救表。以桂枝湯。殊不知仲景云。太陽與少陰俱病。則頭疼。爲太陽邪盛於表。口乾而渴。爲少陰邪盛於裏也。陽明與太陰俱病。則身熱譫語。爲陽明邪盛於表。不欲食腹滿。爲太陰邪盛於裏也。少陽與厥陰俱病。則耳聾。爲少陽邪盛於表。囊縮。爲厥陰邪盛於裏也。三陽之頭疼身熱耳聾。救表也。不可汗乎。三陰之腹滿咽乾口渴囊縮。而厥救裏也。不可下乎。活人書引下利身疼痛虛寒救裏之例。而欲施於煩渴腹滿譫語囊縮熱實之證。然乎否乎。蓋仲景所謂發表者。葛根麻黃是也。所謂救裏者。調胃承氣是也。活人書却謂救裏則是四逆。救表則是桂枝。今以救爲攻。豈不相悖。若用四逆湯。是以火濟火。而腹滿囊縮等證何由而除。臟腑何由而通。榮衛何由而行。六日死者。可立而待也。吁。兩感病故爲不治之證矣。然用藥之法。助正除邪之理。學者不可素無一定之法於胸中也。

傷寒合病併病論

趙嗣真曰。愚嘗疑合病併病之難明也久矣。因始釋之。合病者。二陽經或三陽經同受病。病之不傳者也。併病者。一陽經先病。又過一經。病之傳者也。且如太陽陽明併病一證。若併而未盡。是傳未過。尙有表證。仲景所謂太陽證不罷。面色赤。陽氣拂鬱。在表不得發越。煩燥短氣是也。猶當汗之。麻黃桂枝各半湯。若併之已盡。是爲傳過。仲景所謂太陽證罷。潮熱。手足汗出。大便硬而譫語者是也。法當下之以承氣湯。是

知傳則入腑。不傳則不入腑。所以仲景論太陽陽明合病。止出三證。如前於太陽陽明併病。則言其有傳變如此也。又三陽互相合病。皆自下。今仲景太陽陽明合病。則主於葛根湯。太陽少陰合病。主以黃芩湯。少陽陽明合病。主以承氣湯。至於太陽少陽併病。其證頭項強痛。目眩。如結胸。心不痞硬。當刺太椎。肺臑。肝臑。不可汗下。太陽陽明併病。已見上論。但三陽合病。仲景無背強惡寒語句。雖別有口燥渴。心煩背微惡寒者。乃屬太陽證。而非三陽合病也。三陽若與三陰合病。卽是兩感。所以三陰無合病例也。

傷寒變溫熱病論

趙嗣真曰。按仲景論謂冬月冒寒。伏藏於肌膚而未卽病。因春溫氣所變。則爲熱。夫變者。改易之義也。至此則伏寒各隨春夏之氣。改變爲溫爲熱。既變之後。不得復言其爲寒也。所以仲景云。溫病不惡寒者。其理可見矣。活人書發於溫病曰。陽熱未盛。爲寒所制。豈有伏寒既已變而爲溫。尙可言寒能制其陽熱邪。又於熱病曰。陽熱已盛。寒不能制。亦不當復言其爲寒也。蓋是春夏陽熱已變。其伏寒卽非有寒能制其陽熱爾。外有寒邪能折陽氣者。乃是時行寒疾。仲景所謂春分已後。秋分節前。天有暴寒。爲時行寒疾是也。三月四月。其時陽氣尙弱。爲寒所折。病熱則輕。五月六月。陽氣已盛。爲寒所折。病熱則重。七月八月。陽氣已衰。爲寒所折。病熱亦微。是知時行寒疾。與溫熱二病。所論陽氣盛衰。時月則同。至於論暴寒之寒。與伏寒已變之寒。自是相遠。名不正。則言不順矣。仲景又云。其病與溫及暑病相似。但治有殊耳。要在辨其病源寒熱溫三者之殊。則用藥之冷熱判然矣。趙氏爲活人書釋疑曰。活人書之可疑者甚多。仲景論亦

有可疑者。如白虎湯。仲景既云表不解者。不可與之。白虎加人參湯證。一曰惡風。一曰惡寒。豈非表不解而復用白虎。何耶。蓋惡風曰微。則但見於背而不至甚。於惡寒曰時。時則時。或乍寒而不常。是表證已輕。非若前證脈浮沉發熱無汗。全不解者。此則加大熱大渴。所以用白虎而無疑也。又曰。仲景論太陽病。得之八九日如瘧狀。發熱惡寒。熱多寒少。其人不嘔。清便欲自可。一日二三度發。脈微緩者。爲欲愈。若脈微而惡寒者。此陰陽俱虛。不可便發汗。更下更吐也。面色反有赤色者。未欲解也。以其不能得小汗出。其身必痒。宜桂枝麻黃各半湯。仲景之意。蓋以得病之八九日如瘧狀。發熱惡寒。熱多寒少。十六字。爲自初至今之證下文。乃是已後擬病防變之辭。當分作三截看。若其人不嘔。清便欲自可。一日二三度發。脈浮緩爲欲愈。此一節。乃表和無病而脈微者。邪氣微緩也。陰陽同等。脈證皆向安之兆。可不待汗而欲自愈。若脈微而惡寒者。此陰陽俱虛。不可更汗。更下更吐之。此一節。宜溫之。若面色反有赤色者。未欲解也。以其不能得少汗出。其身必痒。宜桂枝麻黃各半湯。此一節。必待汗而愈也。活人書不詳文意。却將其人不嘔。清便欲自可。九字。本是愈之證。反以他證各半湯汗之。又將不可汗。吐下證及各半湯證。語句並脫。略而不言。取此證而用彼藥。汗其所不當汗。何也。若是可見。仲景文法多如此。學者必須反覆詳翫。熟觀其意。其例自見。則治不差。故趙氏嗣真曰。仲景之書。一字不同。則治隔霄壤。讀之者。可不於片言隻字以求其意歟。

問曰。傷寒溫病。可以脈辯。答曰。溫病於冬時感寒所得也。至春變爲溫病耳。傷寒汗下不愈而過經。其證尙在而不除者。亦溫病也。經曰。溫病之脈。行在諸經。不知何經之動。隨其經之所在而取之。

如太陽證。頭疼惡寒。汗下後過經不愈。診得尺寸俱浮者。太陽病溫也。

如身熱目疼。汗下後過經不愈。診得尺寸俱長者。陽明病溫也。

如胸脅痛。汗下後過經不愈。診得尺寸俱弦者。少陽病溫也。

如腹滿噎乾。診得尺寸俱沉細。過經不愈。太陰病溫也。

如口燥舌乾而渴。診得尺寸俱沉。過經不愈者。少陰病溫也。

如煩滿囊縮。診得尺寸俱微緩。過經不愈者。厥陰病溫也。

是故隨其經而取之。隨其證而治之。如發斑乃溫毒也。

治溫大抵不宜發汗。過時而發。不在表也。已經汗下。亦不在表也。經曰。不惡寒而反渴者。溫病也。明其熱自內達外。無表證明矣。

凡看傷寒。且要識各經中死證死脈。親切須一一理會過。免致臨病疑惑。但見死證。便以脈參之。如果有疑切莫下藥。雖至親挽。亦不可治。倘有差失。咎將歸於己矣。

雜病諸病方法

前引

死生脈候

陽病熱證不退。反似陰脈。凶。

汗後熱退。陰脈。瘥。

陰陽諸證。脈平。吉。

傷寒咳逆上氣。脈散者。凶。

脈浮而滑。身汗如油。喘息不休。水漿不入。身體不仁。乍靜乍喘者。死。汗出髮潤。喘不休者。肺先絕也。

陽反獨留。體如烟熏。直視搖頭。心先絕也。

唇吻反青。四肢澀澀。汗出。肝先絕也。

環口黧黑。虛汗發黃。脾先絕也。

三部緊盛。大汗出不解者。死。

陰陽尺寸俱虛。熱不止者。死。

身熱喘鼈。見陽脈而燥者。死。

汗後微熱不解。未可言死。如轉索者。即日死也。

譫語微熱。脈浮大。手足溫。欲汗出。脈暴出者。死也。

陰衰欲絕。而陽暴獨勝。則脈出一日。陰氣先絕。陽氣後竭。死。

逆冷脈沉細者。一日死。

死證雖多。至於危極處。無過死也。

凡看傷寒。初學後生。不可輕易治之。治其病之可曉者。缺其不可曉者。胸中證不明白。有一毫疑惑。不可強治。故君子不強其所不能。若不量力。私於親故。惑見利而動。輕易玩弄。視人命如草芥。非君子之用心也。謹而敬慎。毋怠毋忽。

初得傷寒一二日。頭痛惡寒皆除。便覺胸中連臍腹注悶疼痛。脈沉有力。坐臥不安。上氣喘足。不候他證。便可用下藥。若頭項強痛。惡寒發熱。每日如此。不可以日數多少。病尚在太陽經。正宜發汗。要在隨所見者。表裏而治之。不必拘於日數也。若煩渴欲飲水。由內水消竭。欲得外水自救耳。大渴欲飲一升。止與一半。常令不足。不可過飲。若過飲水。重則爲水結之證。射於肺爲喘爲咳。留于胃一噎爲噎。溢於脾爲腫。畜於下焦爲癰。皆飲水之過也。病若二十餘日以上。有下證者。止宜大柴胡湯。恐承氣大峻。蓋傷寒過經。則正氣多虛故也。

病七八日。未得汗。大便閉。發黃生斑。譫語而渴。越婢桃仁湯主之。

病八九日。已經汗下。脈尚洪數。兩日如火。五心煩熱。狂叫欲走。三黃石膏湯主之。

病五六日。但頭汗出。身無汗。際頸而還。小便自利。渴飲水漿。此瘀血證也。宜犀角地黃湯。桃仁承氣湯。看上下虛實。用犀角地黃湯治上。桃仁承氣湯治中。抵當湯丸治下也。

病六七日。別無刑尅證候。忽然冒昧。不知人事。六脈俱靜。或至無脈。此欲汗勿攻之。如久旱將雨。六合陰

晦雨後庶物皆甦。換陽之吉兆也。夫今人治傷寒。一二日間。不問屬虛屬實。便用桂枝湯之類。以汗之。三五日後。不問在表在裏。便以承氣湯之類。以下之。多致內外俱虛。諸變蜂起。大抵病人虛實表裏不同。所以邪之傳變有異。豈可以日數爲準。蓋有卽傳者。有傳一二經而止者。有始終只在一經者。不必拘始太陽終厥陰也。

傷寒無出於仲景書。但文字深奧。非淺學可彷彿。況其殘缺頗多。晉人作全書。詮次其中。不可曉處。十有四五。苟未能統之有宗。會之有元。未易窺測。臨病之際。不能無惑。必須破的而後用。又恐病危有所不逮。旣不可不救。又不可失之苟且。今備此數事。以備緩急之用。非博雅通醫之所尙。

已上略引東垣先生引舉。

陰證

初病無熱。更四肢厥冷。或胸腹中滿。或嘔吐腹滿。痛下利。脈細無力。此自陰證受寒。卽真陰證。非從陽經傳來。便宜溫之。不宜少緩。經云。發熱惡寒者。發於陽也。無熱惡寒者。發於陰也。治宜四逆湯。凡腹滿腹痛。皆是陰證。只有微甚不同。治難一概。腹痛不大便。桂枝芍藥湯。腹痛甚。桂枝大黃湯。若自利腹痛。小便清白。便當溫理。中四逆。看微甚用。輕者五積散。重者四逆湯。

無脈者。通脈四逆湯。使陰退而陽復也。

陰毒並手足指甲皆青。脈沉細而急者。四逆湯。無脈者。通脈四逆湯。陰毒甘草湯。臍中葱熨。氣海關元着。

又可灸二三百壯。仍用溫和補氣之藥通其內外。以復陽氣。若俱不效。死證也。

凡傷寒陰證難看。凡看傷寒。惟陰證最難識。自然陰證人皆可曉。及至反常。則不能矣。如身不發熱。手足厥冷。好靜沉默。不渴。泄利。腹痛。脈沉細。人共知爲陰證矣。至於發熱而赤。煩燥不安。揭去衣被。飲冷。脈大人皆不識。認作陽證。誤投寒藥。死者多矣。必須憑脈下藥。至爲切當。不問浮沉大小。但指下無力。按至筋骨全無力者。必有伏陰。不可與涼劑。急與五積散一服。通解表裏之寒。隨手而愈。但更有沉寒之甚。須用姜附以退之。祕之勿泄。脈雖洪大。按之無力者。重按全無。便是陰證。

凡治傷寒尺脈弱而無力者。切忌汗下。宜小柴胡湯和解之。陽毒傷寒。服藥不效。斑爛皮膚。手足皮俱脫。身如塗硃。眼珠如火。燥渴欲死。脈洪大而有力量。昏不知人。宜三黃石膏湯主之。

凡看傷寒。須問病人有何疼痛處。所欲飲食大便。併服過何藥。問有吐蛔者。雖有大熱。忌下涼藥。犯之必死。蓋胃中有寒。則蛔上入膈。大凶之兆。急用炮乾姜理中湯加烏梅二箇煎服。蛔安。却以小柴胡湯退熱。蓋蛔性聞酸則靜。見苦則安故也。

凡看傷寒。有口沃白沫。或睡多流冷涎。俱是有寒。吳茱萸湯理中眞武湯之類。看輕重用。切忌涼藥。雜病亦然。或用甘溫藥補元氣。四君子湯加附子一片。血虛用仲景八味丸。

傷暑

傷暑與傷寒俱有熱。若誤作傷寒治之。則不可。蓋寒傷形。熱傷氣。傷寒則外惡寒而脈浮緊。傷暑則不惡

寒而脈虛。此爲異耳。經云脈盛身寒。得之傷寒。脈虛身熱。得之傷暑。治宜小柴胡湯。渴加知母石膏。或人參白虎湯。天久淫雨。溫令大行。蒼朮白虎湯。若元氣素弱。而傷之重者。清暑益氣湯治之。

急下急溫

凡言急下。蓋病熱已迫。將有變也。非若他病尙可少緩。如少陰屬腎水。主口燥咽乾而渴。乃熱邪內炎。腎水將絕。故當急下。以救將絕之水。如腹脹不大便。土勝水也。亦當急下。陽明屬土。汗多熱盛。急下以存津液。腹滿痛以爲土實。急當下之。熱病目不明。熱不已者死。目睛不明。腎水已竭。不能照物。則已危矣。須急下之。少陰急溫有二證。內寒已甚。陽和之氣欲絕。宜急溫之。無疑也。少陰病得之二三日。口燥咽乾。急下之大承氣湯。

少陰病自利欲絕。青色。心下必痛。口燥咽乾。急下之大承氣湯。

少陰病六七日。腹脹不大便。急下之大承氣湯。

陽明病發熱汗多。胃汁乾。急下之大承氣湯。汗出不解。腹滿痛。急下之大承氣湯。

少陰病脈沉微。急溫之四逆湯。

諸方

羌活沖和湯

治太陽無汗發熱。頭痛惡寒。脊強。脈浮沉。又治非冬時。天有暴寒中人。亦頭痛惡寒發熱。通宜此湯治之。

以代麻黃湯。用太陽經之神藥也。

羌活錢半

防風壹錢

蒼朮錢半

黃芩壹錢

川芎壹錢

白芷壹錢

甘草壹錢

生地黄壹錢

細辛伍分。不可多。

右水二鍾。煎至八分。熱服。溫被蓋覆。取微汗。濕土司天。加蒼朮一錢半。天久淫雨。亦加。如渴。加石膏三錢。知母壹錢。不渴不加。

太陽傷風。有汗。脈浮緩。

羌活壹錢

防風壹錢半

白朮壹錢半

黃芩壹錢

白芷壹錢

甘草壹錢

生地黄錢半

川芎

右如前煎法。若一服汗還未止。加黃芩壹錢伍分。芍藥壹錢。仍未止。以小柴胡加桂枝芍藥各壹錢。葛根湯。

治太陽病。項背強急。無汗。惡風。脈帶弦浮而發熱。又治太陽與陽明合病。必自利。此湯並主之。

葛根壹錢

甘草貳錢

麻黃貳錢。去節。湯泡貳次。

右水貳鍾。姜四片。棗貳枚。煎服。微覆取汗。

解肌湯

治瘧病。天行頭痛。壯熱。春感青邪。發熱而渴。不惡寒。

葛根貳錢

桂枝貳錢

黃芩壹錢

芍藥壹錢

麻黃壹錢。伍分。

甘草壹錢

右水貳鍾。棗貳枚。煎服。如不解。再取汗。

獨活散

治傷風溫熱等病。

羌活

獨活

枳殼

防風

黃芩

麻黃湯泡貳次

人參

甘菊花

甘草炙

茯苓

蔓荊子

細辛各壹錢

石膏貳錢

右水貳鍾。生姜三片。薄荷五葉。同煎法。

敗毒散

治傷風溫疫。風濕頭目昏眩。四肢疼痛。增寒壯熱。項強。目睛疼。尋常風眩拘急。

羌活

獨活

前胡

柴胡

川芎

枳殼

桔梗

茯苓

人參

甘草

右各等分。水貳鍾。如常煎服。

六神湯解散

麻黃貳兩

甘草壹兩伍錢

黃芩貳兩

石膏貳兩

滑石貳兩

蒼朮肆兩

治時行三日前。加葱白香豉煎服。而汗之立效。中病即止。不可盡劑。

小柴胡湯

治太陽病十日已去。脈細而嗜臥。外雖已解。設胸滿痛與服之。若脈浮者。麻黃湯。傷寒五六日。中風來往寒熱。胸脅苦痛。默默不欲食。心煩喜嘔。或煩而不嘔。或渴。或腹中痛。或脅下痞硬。或心下悸。小便利。或不利。身有微熱者。此湯主之。血氣弱。腠理開。邪氣因入。與正氣相搏。結於胸下。邪正分爭。往來寒熱。休作有時。默默不欲食。臟腑相連。其痛必下。邪高痛下。致使嘔也。此湯主之。服柴胡湯已渴者。屬陽明。以法治之。傷寒五六日。身熱惡風。頭項強。脅下滿。手足溫而渴者。此湯主之。傷寒陽脈濡。陰脈弦。腹中急痛。先與小建中湯。不瘥者。此湯主之。太陽病過經十餘日。發汗吐下。後四五日。陽證仍在者。先與小柴胡湯。嘔不止。心下鬱微煩者。爲未解也。與大柴胡湯下之。則愈。婦人中風七八日。續得寒熱。發作有時。經水適斷者。此爲熱入血室。其血必結。致使如瘧狀。此湯主之。傷寒五六日。頭汗出。微惡寒。手足冷。心下滿。不欲食。大便硬。脈細者。爲陽微結。必有表。復有裏。脈沉亦裏也。汗出爲陽微。假令仍純陰結。不得復有外證。悉入在裏。此爲半在表。半在裏也。脈雖沉緊。不得爲少陽病。所以然者。陰不得有汗也。今頭汗出。故知非少陰也。可與服此湯。設不得尿而解。傷寒五六日。嘔而發熱者。柴胡湯證具。而以他藥下之。柴胡證在者。復與小柴胡湯。雖下之不爲逆。必蒸蒸而振。却發熱汗出而解。若心下滿而腹痛者。此爲結胸也。大陷胸湯主之。但滿而不痛者。此爲痞氣。柴胡不中與之。宜半夏瀉心湯。已上屬太陽經陽明病發潮熱。大便溼。小便自可。胸脅不利者。與此湯服之。陽明病脅下硬滿。不大便而嘔。舌上白胎者。可與服之。上焦得通。津液得下。胃氣因和。濇然汗出而解。陽明中風。脈弦浮大。而短氣。腹部滿。脅下及心痛。久按之氣不通。鼻乾不得臥。一

身及目悉黃。小便難。有潮熱。時時噦。身前後腫。刺之少瘥。外不解。病過十日。脈續浮者。此湯主之。已上屬陽明經。太陽病不解。轉入少陽。脅下滿。乾嘔。不能食。往來寒熱。尚未吐下。脈沉緊者。此湯主之。若已吐下。後發汗。溫針譴語。小柴胡湯證罷。此爲壞證。知犯何逆。以法治之。已上屬少陽經。嘔而發熱。宜服此湯。傷寒已後更發熱。此湯主之。若脈浮者。以汗解之。屬陽易。瘥後勞復。脈證。

黃芩

壹兩半。若腹中痛。去芩。加芍藥壹兩半。若心下悸。小便不利。去芩。加茯苓壹兩。

人參

壹兩半。若不渴。外有微熱者。去參。加桂枝壹兩半。溫覆得微汗愈。若咳嗽者。去參。加五味子壹兩伍分。

大棗

陸枚。若脅下硬痞。去棗。加牡蠣貳兩。或壹兩。

半夏

壹兩。湯泡。若胸煩不嘔者。去半夏。人參。加枳實壹枚。用肆分之壹。

柴胡

肆兩。去蘆。

甘草 壹兩半。

右每服七八錢。生薑四片。棗三枚。水一鍾。煎服。

升麻湯

治傷寒中風。頭痛。增寒。壯熱。肢體疼痛。發熱惡寒。鼻中乾。不得臥。兼治寒暄不時。人多疾疫。乍寒脫着。及暴熱之頃。忽然變寒。身體疼痛。頭重如石。

升麻

甘草

芍藥

葛根

各等分。

右每服七八錢煎如常法若老人去芍藥加柴胡茯苓人參各一錢五積散

治陰經傷冷脾胃不和感冒寒邪

茯苓肆兩

肉桂

人參

川芎各貳兩

厚朴

半夏

芍藥

當歸

麻黃

乾薑各叁兩

甘草貳兩

枳殼伍兩炒

桔梗拾貳兩

陳皮捌兩

蒼朮貳拾肆兩

白芷肆兩

右十六味除枳殼肉桂陳皮外其餘並一處生搗爲粗末用酒拌勻曬乾分作六分大鍋內文武火炒令黃色不得焦攤冷入枳殼肉桂陳皮一處和勻每服五錢水二鍾姜三片煎一鍾服

三黃石膏湯

有傷寒發熱脈大如滑數表裏皆實陽盛怫鬱醫者不達已發其汗病勢不退又復下之大便秘頻小便不利五心煩熱兩目如火鼻乾面赤舌燥齒黃大渴過經已成壞證亦有錯治諸溫而成此症者又八九日已經汗下脈洪數身體壯熱拘急沉重欲治其內由表未解欲發其表則裏證又急趨起不能措手待斃而已殊不知熱在三焦閉澀經絡津液枯涸榮衛不通遂成此症耳

石膏兩半

黃芩

黃連

黃柏各柒錢

豉二合

麻黃

梔子三十箇

右每服一兩水二鍾煎服未中病再服其效如神

傷寒已經汗吐下誤治後三焦生熱脈復洪數譫語不休晝夜喘息鼻加衄血病勢不解身目俱黃狂叫

欲走三黃石膏湯主之。

陽毒傷寒。皮膚斑爛。身如凝血。兩目如火。十指皮俱脫。煩渴燥急不寧。庸醫不識。莫能措手。命在須臾。三黃石膏湯主之。婦人血風證。因崩漏大脫血。或前後去血。因而涸燥。其熱未除。循衣摸床。撮空閉目。不省人事。揚手擲足。搖動不寧。錯語失神。脈弦浮而虛。內有燥熱之極。氣粗鼻乾而不潤。上下運燥。此爲難治。宜服生地黃黃連湯。

治男子去血多者。有此證。其妙不可勝言也。

川芎

生地黃

川歸各柒錢

赤芍藥

梔子

黃芩

黃連各叁錢

防風壹兩

右每服五錢。水煎清飲。徐徐呷之。脈實可再加大黃下之。

大承氣湯。氣藥也。自外而之內者用之。生地黃黃連湯。血藥也。自內而之外者用之。氣血合病。循衣摸空。治同。自氣而之血。血而復之氣者。大承氣湯下之。自血而之氣。氣而復之血者。生地黃黃連湯主之。二者俱不大便。此是承氣湯對子。又與三黃石膏湯相表裏。是皆三焦胞絡虛火之用也。病既危急。只得以此湯降血中之火耳。不但婦人用之。男子去血過多。而有此證者。皆宜服之。無不效。予故表而出之。傷寒脈浮常汗。麻黃湯。若脈在筋骨之間。半表半裏當和解。小柴胡湯。在筋骨之間當下。承氣湯。若又在筋骨之下。謂之陰證矣。其法理中。常用附子之類。

傷寒頭略痛發熱耳聾脅痛或往來寒熱如瘧此方治之名和解散

柴胡貳錢

黃芩壹錢

人參壹錢

半夏壹錢

甘草壹錢

右水二鍾。生姜三片。棗子二枚。煎八分。不拘時服。如嘔逆加姜九片。陳皮一錢。如頭痛惡寒加羌活防風各一錢。寒熱間作加桂枝等藥各一錢。夏月中暑發熱頭痛加黃連一錢。春天溫病時行加生地黃川升麻一錢。瘡疾或先寒後熱先熱後寒加川常山尖檳榔半錢。各要未發時煎服。傷寒惡寒頭項強發熱前方沖和湯內去細辛蒼朮加白朮二錢。

傷寒家秘的本

陶 華 述

傷寒家祕的本

本館據古今醫統正
脈全書本排印初編
各叢書僅有此本

傷寒家祕的本

明 餘杭節菴陶 華述

傷寒總論

治傷寒業擅專門。誠爲重寄。論死生。易如反掌。利莫荷圖。雜證緩可取方。傷寒專在活法。原傷寒有活人書。明理論。指掌圖。傷寒論。其中有論缺方者。有方失論者。有脈無證者。有證無法者。非仲景之全書。緣其歷年已久。遺失頗多。王叔和以斷簡殘篇。而補方造論。成無已順文註釋。而集成全書。所以遺禍至今。而未已也。較今庸俗治傷寒。一二日。不問屬虛屬實。而使用麻黃桂枝之類。汗之。三四日。不問在經在腑。而使用柴胡之類。和之。五六日。不問在表在裏。而使用承氣之類。下之。以致內外俱虛。變證蜂起。大抵病人表裏虛實不同。邪之傳變有異。豈可以日數爲准。蓋風寒初中人無常。或入於陰。或入於陽。事無定體。非但始太陽終厥陰論也。或有自太陰始。日傳一經。六日傳至厥陰。邪氣衰不傳而愈者。或有不罷再傳者。或有卽傳者。或有間經而傳者。或有傳至二三經而止者。或有始終只在一經者。或有越經而傳者。或有初入太陽。不作鬱熱。便入少陰。而成真陰證者。或有直中陰經。而成寒證者。或有證變者。或有脈變者。或有取證不取脈者。或有取脈不取證者。緣經無明文。後人有妄治之失。況前人立法之差。使後人蒙害者多矣。夫麻黃桂枝二湯。仲景立治冬時正傷寒之方。今人通治非時暴寒溫暑之誤。又將傳經陰證與直

中陰經之陰證混同立論。豈爲善乎。暴寒溫暑必有別方。直中傳陰必有活法。今皆亡失而無徵也。古人之書引領後進。書不盡意。意不盡言。說其大槩。雖博古而通今。皆在得其傳受。須活潑潑地。且活法者。如珠走盤。但見太陽證者。宜直攻太陽。但見少陰。直攻少陰。此活法也。仲景又云。日數雖多。但有表證而脈浮者。尤宜汗之。日數雖少。但有裏證而脈沉者。尤宜下之。此先賢之確論也。切不可執定一二日發表。三四日和解。五六日方下。此庸醫執死法也。務俾審脈驗證。辨名定經。一一親切無疑。方可下手。真知其爲表邪而汗之。真知其爲裏邪而下之。真知其爲直中而溫之。如此而汗。如彼而下。又如彼而溫。桂枝承氣投之不差。姜附理中發而必當。匕劑少差。死證立見。可不深思而熟慮哉。仲景取方立論甚嚴。曰可溫。曰可汗。曰少與。曰急下。與夫先溫其裏。乃攻其表。先解其表。乃攻其裏。得其綱領者不難也。如響應聲。如影隨形。見病者則目識心通。見醫人則接談無慮。不得其傳者實難也。見病者舉手無措。見醫人則汗顏赧默。此猶繡麒麟耳。正謂名譽虛隆而實德則病矣。嗟夫。常病用常法。誰人不知。設有感冒非時暴寒而誤認作正傷寒者。有勞力感寒而誤認作真傷寒者。有雜證類傷風而誤認作傷寒治者。有直中陰經真寒證而誤認作傳經之熱證者。有溫熱病而誤認作正傷寒治者。有暑證而誤認作傷寒治者。有如狂而認作發狂者。有血證發黃而誤認濕熱發黃者。有蚊迹而認作發斑者。有動陰血而認作鼻衄者。有譫語而認作狂言者。有獨語而認作鄭聲者。有女勞復而認作陰陽易者。有短氣而認作發喘者。有痞滿而認作結胸者。有心下硬痛下利純清水而俗呼爲漏底者。有噦而誤認乾嘔者。有併病而認作合病者。有正陽

明腑病而認作陽明經病者。有太陽證無脈而便認死證者。有裏惡寒而認作表惡寒者。有表熱而誤作裏熱者。有陰發燥而認作陽證者。有少陰病發熱而認作太陽證者。有標本全不曉者。此幾件終世不相認者。比比然乎。胸中若不證脈講明論方得法。但同庸俗一槩妄治。此殺人不用刀耳。非惟救人功大。亦且陰隲匪輕。吾老矣。傷寒專科。實得仲景先師厥旨。雖無萬全之功。十中可生八九。曾著有書。不能盡心刻骨。因今老邁。後恐繼業者不得其傳。有玷名行。遂將一生所畜肺腑語句。并家祕不傳之妙。及一提金殺車槌法。逐一語錄于後。論註證而證註脈。脈註法而法註方。再三叮嚀。吾後子孫。不必集閑方而覩別論。別繁亂而莫知其源。必須熟記。久則自然精貫。不與庸醫伍。不使時醫笑可也。爾宜珍藏受授。謹之慎之。毋怠毋忽。故戒。

傷寒祕要脈證指法 與瑣言大略同

傷寒治法。得其綱領者。如拾芥。若求之多岐。則支離破碎。如涉海問津矣。蓋脈證與理而已。傷寒之脈。以浮大動數爲陽。沉瀼弱弦微爲陰。然脈理精深。今人何能到此田地耶。夫脈者。非血非氣。乃營行之道路。實先天後天之大造。無所窮盡。叔和脈云。指下難明者。真言也。今人誇誕通曉者。但能言而不能行也。吾老專以浮中沉三脈候而治之。察其陰陽表裏虛實寒熱。如見其肺肝然。無所逃其情矣。既云傷寒。則寒邪自外入內而傷之。其入則有淺深次第。自表達裏。先入皮膚肌肉。次入筋骨腸胃。以此推之。而不難也。原風寒初入。或先太陽寒水之經。此經本寒標熱。便有惡風惡寒。頭疼發熱。蓋寒鬱皮毛。是爲表證。若在

他經則無此證矣。脈若浮緊，無汗，爲傷寒。用麻黃湯發之，得汗爲解。脈若浮緩，有汗，爲傷風。用桂枝湯以散邪。汗止爲解。若無頭疼惡寒，脈又不浮，此爲表證罷而在中者，卽半表半裏之間也。乃陽明少陽之分脈，又不浮不沉，在乎肌骨之間，謂皮膚之下，然則有二焉。若微洪而長，陽明脈也。外證則目痛、鼻乾、不眠，用葛根以解肌。脈弦而數，少陽脈也。其證胸脇痛而耳聾，寒熱嘔而口苦，如見此證，此脈便以小柴胡和之。蓋陽明少陽二經不從標本從乎中也。過此邪入裏爲熱實，脈不浮而沉，沉則按之筋骨之間，方是。若是脈來沉實有力，外證則不惡風寒而反惡熱，譫語大渴，或潮熱自汗，或揚手擲足，揭去衣被，五六日不大便，明其熱入裏，而腸胃燥實也。輕則大柴胡湯，重則三承氣湯，選用大便通而熱愈矣。若脈來沉遲無力，此爲直中陰經真寒證之陰脈。其證無頭痛，無身熱，初起怕寒，手足厥冷，或戰慄蹠臥，不渴，兼之腹痛、嘔吐泄瀉，或口出涎沫，面如刀刮者，乃陰經自中之寒，不從陽經傳入，故不在傳經熱證治例。更當看外證如何。輕則理中湯，重則姜附四逆以溫之。其中緊要關節，吾再表而出之。太陽者，陽證之表。陽明者，陽證之裏。少陽者，二陽三陰之間。太陰少陰厥陰又居於裏，總而謂之陰證。然三陰俱是沉脈，妙在指下有力無力中分。有力者爲陽，爲實，爲熱；無力者爲陰，爲虛，爲寒，最爲切當。其三陽經證前論已云，不再多錄。夫三陰傳經熱證，脈雖開明，論尤未詳，重加訂證。如腹滿咽乾，屬太陰，舌乾口燥，屬少陰，煩滿囊縮，屬厥陰。此三者俱是陽經傳入陰經之熱證。脈見沉實有力，急當攻裏下之。如其下後利不止，身疼痛，脈反沉細無力，又當救裏溫之。此權變之法也。三陰傳經熱證，與其三陰直中寒證，脈雖沉而有力無力所別。

證有異而治各不同。是其大法也。歟。前云正陽明病。本經風盛氣實。脈亦沉實有力者。因邪熱傳入胃腑。而有燥屎。此一節指腑病屬裏而言也。實證治之奇功。指法之玄妙。祕之不與俗人言之耳。今將浮中沉三脈。列爲三圖。圖下就註證治之法。使因脈以知證。緣證以明治。以此達彼。猶粗入精。亦可以爲後人之宗也。

論浮脈形法主病

浮初排指於皮膚之上。輕手按之。使得曰浮。此爲寒邪初入太陽陽經。病在表之標。可發而去之。雖然。治之則有二焉。寒傷榮。則無汗惡寒。用麻黃湯。風傷衛。則自汗惡風。用桂枝湯。一通一塞。不可同也。浮緊有力。無汗惡寒。頭項痛。腰脊強。發熱。此爲傷寒在表。宜發散。冬時麻黃湯。春夏秋皆用羌活冲和湯。浮緩有汗。惡風。頭項痛。腰脊強。發熱。此爲傷風在表。冬時用桂枝湯。餘三時用加減冲和湯。腹痛小建中湯。痛甚者桂枝大黃湯。

論中脈形狀指法主病

中按至皮膚之下。肌骨之間。略重按之。乃得。謂之半表半裏證也。然亦有二焉。蓋陽明少陽二經。不從標本。從乎中也。

長而有力。卽微洪脈也。此爲陽明在經。其證微有頭疼。眼眶痛。鼻乾。不得眠。發熱無汗。用葛根解肌湯。若渴而有汗不解。或經汗過渴不解者。用白虎湯加人參。無渴不可服此藥。爲大忌。

弦而數。此爲少陽經脈。其證胸脇痛而耳聾。寒熱嘔而口苦。俱用小柴胡湯。本方自有加減法。或兩經合病。則脈弦而長。此湯加葛根芍藥。緣膽無出入。有三禁止。宜和解表裏。

論沉脈形狀指法主病

沉重手按至肌肉之下。筋骨之間。此爲沉脈。亦有二焉。陰陽寒熱。在沉脈中分。無人知此。實祕訣耶。沉數有力。則爲陽明之本。表證解而熱入于裏。惡寒頭疼悉除。反覺怕熱。欲揭衣被。揚手擲足。譫語狂妄。燥渴。或潮熱自汗。五六日不大便。輕則大柴胡湯。重則三承氣選用。沉遲無力爲寒。外證無頭疼。無身熱不渴。初起怕寒。厥冷倦臥。兼或腹痛吐瀉。或戰慄。面如刀刮。或口吐白沫冷涎。皆是陰經自中真寒證。輕則理中湯。重則姜附四逆湯溫之。傷寒至沉脈。方分陰陽。仔細體認。下藥不可造次。倘有差失。咎將歸己。凡診脈須分三部九候。每部必先浮診三候。輕生於皮膚之上。候三動也。中診三候。略重指於皮膚之下。肌肉之上。候三動也。沉診三候。重手於肌肉之下。筋骨之上。候三動也。三三而成九候。然後知病之淺深表裏。以爲處治之標的。豈可忽略於脈。而欲求病之所在乎。切脈謂之巧。得心應指。自然神効。有枉死者。此吾所不信也。若不明脈識證。狂妄行醫。視人命如草芥。他日若不受天殃。吾亦不信也。

辯脈雖浮亦有可下者。脈雖沉亦有可汗者。

夫脈浮當汗。脈沉當下。固其宜也。其脈雖浮亦有可下者。謂邪熱入腑。大便難也。大便不難。豈敢下乎。其

脈雖沉亦有可汗者。謂少陰病身有熱也。假若身不發熱。豈敢汗乎。此取證不取脈也。

論風傷衛氣寒傷榮血辯

蓋風則傷衛氣。寒則傷榮血者。緣氣本屬陽。風屬陽。陽則從陽。故傷衛氣。陽主開泄。皆令自汗。故用桂枝湯。辛甘溫之劑以實表。血本屬陰。寒屬陰。陰則從陰。故傷榮血。陰主閉藏。皆令無汗。故用麻黃湯。輕揚之劑以發表。正所謂水流濕而火就燥。雲從龍而風從虎。各從其類者是也。

用藥寒溫辯

夫發表之藥用溫。攻裏之藥用寒。溫裏之藥用熱者。表既有邪。則爲陽虛陰盛。溫之乃所以爲陽。陽有所助而長。則陰邪所由以消。故用辛甘溫之劑。發散爲陽。此指發表之藥用溫者明矣。裏既有邪。則爲陰虛陽盛。寒之乃所以助陰而抑陽。陽受其抑則微。而真陰所由以長。故用酸苦之劑。瀉泄爲陰。此指攻裏之藥用寒者明矣。陰經自受寒邪。則爲臟病。主陽不足。而陰有餘。故用辛熱之劑。以助陽抑陰。此指溫經之藥用熱者明矣。表有邪。不汗之。其邪何從而去。裏有邪。不下之。其邪何從而出。臟有寒。不溫之。其寒何從而除。此三者。所謂用藥寒溫辯也。

正傷寒及溫暑暴寒勞力感冒時疫治各不同論

夫傷寒二字。蓋冬時天氣嚴寒。以水冰地凍而成。殺厲之氣。人觸犯之。卽時病者。爲正傷寒。乃有惡寒頭疼發熱之證。故用麻黃桂枝發散表中寒邪。自然熱退身涼。有何變證。如或頭疼惡寒。表證皆除。而反見

證語。怕熱燥渴。大便閉者。以法下之。大便通而熱愈。有何怪證。其餘春夏秋三時。雖有惡寒身熱頭疼。亦微。卽爲感冒。非時暴寒之輕。非比冬時氣正傷寒爲重也。如冬感寒。不卽病。伏藏於肌膚。至春夏時。其伏寒各隨時氣改變。爲溫爲熱者。因溫暑將發。又受暴寒。故春變爲溫病。既變之後。不得復言其爲寒矣。所以仲景有云。發熱不惡寒而渴者。其理可見。溫病也。暑病亦然。比之溫病。尤加熱也。不惡寒則病非外來。渴則明其熱自內達表。無表證明矣。治溫暑大抵不宜發汗。過時而發。不在表也。其伏寒至夏。又感暴寒。變爲暑病。暑病者。卽熱病也。取夏火當權而言暑字。緣其溫熱二證。從冬時伏寒所化。總曰傷寒。所發之時既異。治之不可混也。若言四時俱是正傷寒者。非也。此三者皆用辛涼之劑以解之。若將冬時正傷寒之藥。通治之。定殺人矣。辛涼者。羌活冲和湯是也。兼能代大青龍湯。治傷寒見風。傷風見寒。爲至穩。一方可代三方。危險之藥如坦夷。其神乎哉。世俗皆所未知也。若表解而裏證具者。亦以法下之。無惑。又傷寒汗下後。過經不愈者。亦溫病也。已經汗下。亦不在表也。隨病制宜。凡有辛苦勞役之人。有患頭疼。惡寒。身熱。加之骨腿酸疼。微渴。自汗。脈雖浮大。而無力。此爲勞力感寒。用補中益氣。兼辛溫之劑。爲良。經云。溫能除大熱。正此謂也。若當和解者。卽以小柴胡加減和之下。證見者。卽以本方加大黃微利之。切勿過用。猛烈。其害非細。若初病無身熱。無頭疼。便就怕寒厥冷。腹痛。嘔吐泄瀉。脈來沉遲無力。此爲直中寒證。宜溫之。而不宜汗下也。疫癘者。皆時行不正之氣。老幼傳染相同者是也。緣人不近穢氣。免傷真氣。若近穢氣。有傷真氣。故病相傳染。正如牆壁固。賊人不敢入。正氣盛。邪氣不敢侵。正氣既虛。邪得乘機而入。與前溫

暑治又不同。表證見者。人參敗毒散。半表半裏證者。小柴胡。裏證具者。大柴胡。下之。無以脈診。以平爲期。與其瘧痢等證。亦時疫也。照常法例治之。

兩感傷寒誤治論 與琅菴同

傷寒兩感者。陰陽雙傳也。雖爲必死之證。猶有可救之理。蓋用藥先後。發表攻裏。本自不同。活人書先救裏。以四逆湯。後攻表。以桂枝湯。殊不知仲景云。太陽與少陰病。頭疼惡寒。邪入表。口乾而渴。邪在裏。陽明與太陰病。身熱目痛。邪在表。不欲食。腹滿。邪在裏。少陽與厥陰病。耳聾脇痛。寒熱而嘔。邪在表。煩滿囊縮。邪在裏。三陽之頭痛。身熱耳聾脇痛。惡寒而嘔。在表者。已自不可下之。其三陰之腹滿。口渴囊縮。譫語在表者。可不下乎。活人書引下利身疼。痛虛寒救裏之例。而欲施治於煩滿囊縮實熱之證。可乎。蓋仲景所謂發表者。葛根麻黃是也。攻裏者。調胃承氣是也。活人書却謂救裏則是四逆。攻表則是桂枝。今以救爲攻。豈不相悖。若用四逆。是火濟火。而腹滿囊縮等證。何由而除。臟腑何由而通。榮衛何由而行。故死者可立而待也。學者豈可執一定之法於胸中乎。

傷寒合病併病論

合病併病。世所難明。若非得其精專。焉能識此證哉。合病者。兩經或三經齊病。不傳者爲合病。併病者。一經先病未盡。又過一經之傳者爲併病。若併而未盡。是傳未過。尚有表證。法當汗之。若併之已盡。是爲傳過。法當下之。是知傳則入腑。不傳不入腑。言其有傳受如此也。三陽互相合病。皆自下利。太陽陽明合病。

主葛根湯。太陽少陽合病。主黃芩湯。少陽陽明合病。主承氣湯。三陽合病。無表證者。俱可下。但三陽經合病。仲景無背惡寒語句。雖則有口燥渴。心煩背微惡寒者。乃屬太陽證。而非三陽合病也。三陽若與三陰合病。卽是兩感。所以三陰無合併例也。

傷寒少陰證似太陽太陽脈似少陰爲反用藥不同論

蓋太陽病脈似少陰。少陰病證似太陽。所以謂之反。而治當異也。今深究其旨。均自脈沉發熱。以其有頭疼。故爲太陽病。脈當浮。今反脈不浮而沉者。以裏虛久寒。正氣衰微所致。今身體疼痛。故宜救裏。使正氣內強。逼邪出外。而乾姜生附亦能出汗而解。假若裏不虛寒。則見脈浮。而正屬太陽麻黃證也。均自脈沉發熱。以其無頭疼。故名少陰病。當無熱。今反寒。邪在表。但皮膚鬱閉而爲熱。而在裏無熱。故用麻黃細辛以發表。間之熱。附子以溫少陰之經。假使寒邪在裏。則外必無熱。當見吐利厥逆等證。而屬正少陰四逆湯證也。以此觀之。表邪浮淺發熱之反尤輕。正氣衰微脈沉之反爲重。此四逆爲劑。不爲不重於麻黃附子細辛湯也。可見熟附配麻黃。發中有補。生附配乾姜。補中有發。所謂太陽少陰脈沉發熱雖同。而受病有無頭疼。與用藥自別。故併言之耳。若誤治之。其死必矣。

傷寒陰陽寒熱二厥辯

陰陽二厥。治之一差。死證立判。夫陽厥者。先自三陽經氣分。因感寒邪。起於頭疼發熱惡寒。已後傳進三陰血分。變出四肢厥冷。乍溫大便秘實。譫語發渴。揚手擲足。不惡寒。反怕熱。脈沉有力。此見傳經熱證。謂

之陽厥。陽極發厥者。卽陽證似陰。外雖有厥冷。內有熱邪耳。蓋因大便結實失下。使血氣不通。故手足乍冷乍溫也。如火煉金。熱極金反化水。水寒極而成冰。反能載物。厥微熱亦微。四逆散。厥深熱亦深。大承氣。正謂亢則害其物。承乃制其極也。若醫人不識。疑是陰厥。復進熱藥。如抱薪救火矣。夫陰厥者。因三陰經血分自受寒邪。初病無身熱。無頭疼。就便惡寒。四肢厥冷。直至臂脛以上。過乎肘膝。不溫。引衣跼臥。不渴。兼或腹痛吐瀉。或戰慄。面如刀刮。口吐涎沫。脈沉遲無力。此爲陰經直中真陰寒證。不從陽經傳入。謂之陰厥也。輕則理中湯。重則四逆湯溫之。勿令誤也。

傷寒結胸痞滿辯

詳見琅言中

傷寒結胸者。今人不分曾下與未下。便呼爲結胸。便與枳桔湯。反成真結胸者有之。殊不知乃因下早而成。未經下者。非結胸也。乃表邪傳至胸中。未入于腑者。雖滿悶尙爲在表。正屬少陽部分。只消小柴胡加枳桔以治其悶。如未効。則以本方對小陷胸湯。一服豁然。其妙如神。祕之。莫與俗人言之耳。若因下早而成者。方可用陷胸湯。分淺深從緩而治之。不宜太峻。此乃清道至高之分。若過下之。則傷元氣也。太陽證發熱惡寒。頭疼無汗。此寒傷榮血。當服麻黃湯發散。醫者不達。而誤下之。榮血重傷。而成痞滿。太陽證頭疼惡寒。發熱自汗。此風傷衛氣。當服桂枝湯散邪實表。醫者不達。而誤下之。衛氣重傷。而成結胸。蓋言榮衛陰陽也。若言寒熱陰陽證者。則誤之甚矣。治法又錄于後條。

傷寒伏陰脈大論用藥之誤

夫病身不熱。頭不痛。初熱怕寒。四肢厥冷。腹痛嘔吐泄瀉。踈臥沉默。譫語。脈來沉遲無力。人皆共知爲陰證必矣。至於發熱。面赤煩燥。揭去衣被。脈大人皆不識。認作陽證。誤投寒藥。死者多矣。殊不知陰證不分熱與不熱。須憑脈下藥。至爲切當。不問脈之浮沉大小。但指下無力。重按全無。便是伏陰。不可與涼藥。服之必死。急與五積散一服。通解表裏之寒。隨手而愈。若內有沉寒。必須姜附以溫之。切忌發泄。脈雖洪大。按之無力。重按全無者。陰脈也。若將伏陰之證。而誤作熱證。用涼藥治之。則渴愈盛。而燥愈急。豈得效乎。此取脈不取證也。

傷寒伏脈辯

夫頭疼發熱惡寒。或一手無脈。兩手全無者。庸俗以爲陽證得陰脈。便呼爲死證。不治。殊不知此因寒邪不得發越。便爲陰伏。故脈伏必有邪汗也。當攻之。又有傷寒病至六七日以來。別無刑尅證候。或昏沉冒昧。不知人事。六脈俱靜。或至無脈。此欲正汗也。勿攻之。此二者便如久旱將雨。六合陰晦。雨後庶物皆甦。換陽之吉兆。正所謂欲雨則天鬱熱。晴霽天乃反涼。理可見也。當攻者發汗。冬用麻黃湯。三時用羌活沖和湯。勿攻者止汗。五味子湯。各有治法。當謹記之。

傷寒言證不言病論詳見項晉中

言證不言病者。深有理哉。夫證之一字。有明證。見證。對證。之義存。且如婦證姦而賊證盜。刃證殺而病對證。不得辭而無逃其情矣。人之心肝脾肺腎。藏而不見。若夫耳目口鼻舌。則露而共見者也。五臟受病人。

焉知之。蓋有諸中。必形諸外。肝病則目不能視。心病舌不能言。脾病口不知味。肺病則鼻不聞香臭。腎病則耳不聽聲。以此言之。其證最親切矣。其太陽經受病。證出頭疼。身熱惡寒。一或傷之。本經之證見矣。將此首經論之餘。經不言可知。吾故曰傷寒言證不言病耳。

傷寒傳足不傳手經論 詳見琅言中

傳足不傳手者。此庸俗之謬論也。豈有是哉。人之充滿一身。無非血氣所養。晝夜循環。運行不見。豈有止行足而不行手乎。況風寒之中人。先入榮衛。吾故明其所由。蓋傷寒者。乃冬時感寒。卽病之名。冬乃坎水用事。其氣嚴凝凜冽。水冰地凍。在時則足太陽少陰正司其令。觸冒之者。則二經受病。其次則足少陽厥陰繼冬而施春令。而夾受傷者。蓋風木之令。起于大寒節。正當三月。至春分後。方行溫令。故風寒亦能傷之。足陽明太陽中土也。與冬時無預。而亦受傷者。土無定位。無成名。無專氣。寄旺於四時。終始於萬物。則四時寒熱溫涼之氣。皆能傷之也。況表邪傳裏。必歸於胃。而爲燥屎。用承氣下之。胃氣和矣。手之六經。主於夏秋。故不傷也。足之六經。蓋受傷之方分境界也。若言傷足不傷手。則可以爲傳足不傳手。則不可也。設或不傳。氣逆作喘。何經而來。如謂不然。仲景設有桂枝麻黃。乃肺經藥也。豈虛言哉。

急下急溫論 與琅言互看

急下急溫者。蓋病勢危篤。將有變也。非若常病可緩。如少陰口燥舌乾而渴。因邪熱內消。腎水將絕。固當急下。以救腎家將絕之水。少陰病自利。純清水。心下硬痛。口燥渴者。急下之。少陰病腹脹硬痛。或邊臍痛。

不大便。土勝水也。急下之。陽明汗多熱盛。恐胃汁乾。急下以存津液。陽明病腹滿痛爲土實。急下之。熱病目不明。熱不止者多死。目睛不明。腎水已竭。不能照物。則已危矣。急宜下之。五者俱大承氣湯。少陰急溫有二證。內寒已盛。陽和之氣欲絕。急溫之。少陰膈上有寒飲乾嘔。不可吐。急溫之。四逆湯。此急救之功也。

傷寒標本論

夫傷寒標本不明。如瞽者夜行。無路可見也。原標者。病之梢末。本者。病之根本。先受病爲本。次受病爲標。標本相傳。先以治其急者。此良法也。假如先起頭痛惡寒。就爲本。已後發熱。就爲標。此受病之標本也。將此一件推之。餘皆倣此。又脈之標本者。假如浮沉爲本。虛實爲標。此脈之標本也。

治傷寒看證法則

凡看傷寒。先觀兩目。或赤或黃。亦爲陽毒。六脈洪大有力。燥渴者。輕則三黃石膏湯。重則大承氣。黃爲疸證。如小水不利。或赤兼小腹脹滿不痛。渴而大便實。脈來沉實有力者。爲濕熱發黃。輕則茵陳五苓散。重則茵陳湯。分利小水。清白爲愈。黃自退矣。却法開在殺車槌方前。次看口舌。有無胎狀。如見滑白色者。邪未入裏。屬半表半裏證。宜小柴胡和解。舌上黃胎者。胃腑有邪熱也。宜下之。調胃承氣湯。大便燥實。脈沉有力。而大渴者。方可下。便不實。脈不沉。微渴者。未可下。尤宜小柴胡湯。舌上黑胎生芒刺者。是腎水尅於心火。十有九死。急用大承氣下之。無疑矣。此邪熱已極也。却法開在殺車槌方前。

已後以手按其心胸至小腹。有無痛處。若按之當心下硬痛。手不可近。燥渴譫語。大便實。脈來沉實有力。

爲結胸證。急用大陷胸湯加枳桔下之。量元氣虛實。宜從緩治。若按心胸雖滿悶不痛。尙爲在表。未入乎腑。乃邪氣填乎胸中。只消小柴胡加枳桔以治其悶。如未効。本方對小陷胸。一服如神。若按之當心下脹滿而不痛者。宜瀉心湯加枳桔。是痞滿也。以手按之小腹若痛。而小水自利。大便黑。兼或身黃。譫妄燥渴。脈沉實者。爲蓄血。桃仁承氣下盡黑物則愈。若按之小腹脹滿不硬痛。小水不利。卽溺澀也。五苓散加減利之。不可大利。恐耗竭津液也。若按小腹邊臍硬痛。渴而小水短赤。大便實者。有燥屎也。大承氣下之。却法備開殺車槌方前。

再後問其大小便通利若何。有何痛處。及服過何藥。方知端的。務使一一明白。證脈相對。庶得下藥無差。凡看傷寒。若見吐蛔者。雖有大熱。忌下涼藥。犯之必死。蓋胃中有寒。則蛔上膈。大凶之兆。人皆未知。急用炮乾姜理中湯一服。加烏梅二箇。花椒十粒。服後待蛔定。却以小柴胡退熱。蓋蛔聞酸則靜。見苦則安矣。凡治傷寒。若煩渴欲飲水者。因內水消竭。欲得外水自救。大渴欲飲一升。正可與一碗。常令不足。不可太過。若恣飲過量。使水停心下。則爲水結胸等證。射于肺爲喘。爲咳。留於胃爲噎。爲噦。溢於皮膚爲腫。蓄於下焦爲癰。滲於腸間則爲利下。皆飲水多之過也。又不可不與。又不可強與。經云。若還不飲。非其治。強飲須教別病生。正此謂也。

凡治傷寒。若經十餘日已上。尙有表證。宜汗者。與羌活沖和湯微汗之。十餘日若有裏證。宜下者。可與大柴胡湯下之。蓋傷寒過經。正氣多虛。恐麻黃承氣太峻。誤用麻黃。令人亡陽。誤用承氣。令人不禁。故有此

戒若表證尙未除而裏證又急。不得不下者。只得以大柴胡通表裏而緩治之。又老弱又血氣兩虛之人。有下證者。亦用大柴胡下之。不傷元氣。如其年壯力盛者。不在禁例。從病制宜。

凡治傷寒。尺脈弱而無力者。切忌汗下。寸脈弱而無力者。切忌發吐。俱宜小柴胡和之。

凡治傷寒。若汗下後。不可便用參朮大補。宜用小柴胡加減和之。若大補使邪氣得補而熱愈盛。復變生他證矣。所謂治傷寒無補法也。如曾經汗下後。果是虛弱之甚。脈見無力者。方可用甘溫之劑補之。此爲良法。其勞力感寒之證。不在禁補之例。看消息用之。

凡治傷暑與傷寒俱有熱。若誤治之。害矣。傷寒則外惡寒而脈浮緊。傷暑則不惡寒而脈虛。此爲不同治。經云。脈盛身寒。得之傷寒。脈虛身熱。得之傷暑。治宜小柴胡湯加石膏。知母。或人參白虎湯。天久淫雨。濕令大行。蒼朮白虎湯。若元氣素弱而傷重者。用清暑益氣湯治之。

傷寒表裏見證治例活法

凡治傷寒。若見頭痛。惡寒發熱。腰項脊強。脈浮者。卽是表證。不拘日數多少。便用解表藥無疑。

凡治傷寒。若見耳聾。脇痛。寒熱嘔而口苦。脈見弦數者。卽是半表半裏證。不拘日數多少。便用和解藥無疑。

凡治傷寒。若頭疼惡寒悉除。及見怕熱。燥渴譫語。揭去衣被。揚手擲足。發狂斑黃。或潮熱自汗。大便不通。小水短赤。或胸中連臍腸注悶疼痛。脈沉有力。或上氣喘促。卽是傳裏熱證。不拘日數多少。便用通利下

藥無疑。

凡治傷寒。若見初病起。無頭疼。無身熱。就便怕寒。四肢厥冷。或腹痛吐瀉。或口吐白沫。或流冷涎。或戰慄。而如刀刮。引衣踰臥。不渴。脈來沉遲無力。卽是直中陰經眞寒證。急用熱藥溫之。無疑。要在隨所見證。表裏而治之。切莫亂投湯劑。不可拘於日數。若非深得仲景之意。豈能至此耶。

三陰無傳經論

凡傷寒邪熱。自三陽傳至三陰。臟腑入裏爲盡。無所復傳。故言無傳經也。如再傳者。足傳手經也。

發熱

翕翕發熱爲表熱。是風寒。熱於皮膚。拂鬱於外。表熱而裏不熱也。無汗。脈浮緊。宜發表。有汗。脈浮緩。宜解肌。蒸蒸發熱者爲裏熱。是陽邪入陷於陰中。裏熱而表不熱也。脈沉實而渴者。宜下之。若表熱未罷。邪氣傳裏。裏未作實。則表裏俱熱。脈必弦數。宜和解。少陰脈沉反發熱者。是未離于表也。麻黃附子細辛湯。如發熱煩渴。小便赤。脈浮大者。此爲表裏俱見。五苓散利之。其陰陽俱虛。熱不止者。汗下後復大熱。脈燥亂者。下利熱不止者。皆死也。

頭痛

頭痛者。寒邪入足太陽經。上攻于頭。此表證也。頭痛脈浮緊。無汗惡寒。可發汗。頭痛脈浮緩。有汗惡寒。宜解肌。照前時令用藥。陽明病不惡寒。反惡熱。五六日不大便。胃實燥渴。熱氣上攻於頭目。脈實者。調胃承

氣下之少陽頭痛者。小柴胡和之。濕家鼻塞頭痛者。瓜蒂散搐鼻。黃水出卽愈。痰涎頭痛。胸滿寒熱者。瓜蒂散吐之。厥陰乾嘔吐涎沫。頭痛者。吳茱萸湯主之。三陽雖有頭疼。不若太陽專主也。三陰無頭痛。惟厥陰有頭痛者。是脈係絡于頂巔也。若痛連於胸。手足俱青。爲眞頭痛。必死矣。

項強

項強者。太陽感邪表證也。無汗。脈浮緊。宜發汗。葛根湯。有汗。脈浮緩。宜解肌。桂枝湯。結胸項強。大陷胸湯。寒濕項強。則成瘧。例載後條。

惡寒

惡寒者。乃寒邪客於榮衛。則洒淅惡寒。維一切屬表尙在腑。陰陽所分。若發熱惡寒。兼之頭疼脊強。脈浮緊者。邪入太陽表證也。宜汗之。照時令用藥。若無熱惡寒。體倦。脈沉遲無力者。寒邪入足少陰裏證也。宜溫之。四逆湯。經云。發熱惡寒發於陽。無熱惡寒發於陰。或有下證悉具。而微惡寒者。大柴胡下之。其少陰病惡寒而踈。手足厥冷煩燥。脈不至者。死也。

惡風

惡風者。風邪傷衛。腠理不密。由是惡風。悉屬於陽。非比惡寒。乃有陰陽之別者。有汗惡風。脈浮緩者。當解肌。隨時用藥。惡風發熱兼喘者。羌活沖和湯。若發汗太過。衛虛亡陽。遂漏不止。惡風脈浮者。桂枝湯加朮附。惡風小便難。四肢拘急。難以屈伸者。同上。若風濕惡風。不欲去衣。骨節痛。汗出短氣。小便不利。身微腫。

者甘草附子湯汗後七八日不解表裏俱熱時惡風大渴舌乾燥而煩者人參白虎湯主之

背惡寒

背惡寒者陽氣不足陽氣不足者陰氣盛陰氣盛者口中和附子湯陽氣內陷者口乾燥白虎湯二者俱背惡宜審治之

寒熱

往來寒熱者陰陽相勝邪正分爭也屬少陽半表半裏證蓋陽不足則陰邪出表而與之爭故陰勝而爲寒陰不足則陽邪入裏而與之爭故陽勝而爲熱邪居表多則多寒邪居裏多則多熱邪在半表半裏則寒熱相半乍往乍來而間作也小柴胡專主往來寒熱寒多者加桂熱多者加大黃是其大法也太陽證八九日如瘧狀一日二三度發不嘔清便脈浮緩者爲自愈不浮緩爲未愈柴胡桂姜湯病至十餘日熱結在裏大渴大便實往來寒熱大柴胡湯若往來寒熱胸脇滿而不痛者半表半裏證未入乎腑小柴胡加枳桔婦人中風七八日續得寒熱發作有時經水適斷爲熱入血室亦用小柴胡治之

潮熱

潮熱者屬正陽明胃腑旺於未日一日一發日脯而作如潮水之有信也專主胃中實熱燥糞使然宜下之如熱不潮大便不實而脈浮表證尙在者未可與承氣湯候大便硬而燥渴與夫自汗譫語潮熱者急當下之無疑矣

似瘧

似瘧者一名瘧狀。作止有時。非若寒熱往來之無定也。太陽證似瘧。脈浮洪。桂枝湯。不嘔清便。一日二三發。屬厥陰。脈浮緩。囊不縮。爲自愈。如脈不浮。及面赤色有熱者。以其不能得小汗。身必痒。用桂麻各半湯。陽明似瘧。煩熱汗出。日晡發熱。脈浮。桂枝湯。脈實者。承氣湯。熱入血室。其血必結。如瘧者。小柴胡湯。熱多寒少。尺脈遲者。建中湯。候尺脈不遲。小柴胡和之。濕瘧脈和平。身無寒。但熱。骨節煩疼。時嘔。白虎湯。加桂。渴者。小柴胡加瓜蒌根湯。治各有異也。

無汗

無汗者。寒邪中經。腠理固密。津液內滲。而無汗也。風暑濕皆令有汗。惟寒邪獨不汗出。太陽證無汗者。各用麻黃湯。春秋羌活冲和湯。夏月神朮湯。項背強。几几無汗者。葛根湯。陽明無汗而喘者。麻黃湯。脈弱無力。難作汗者。血虛也。黃芪建中加朮附湯。剛瘕無汗。自有本條。若夫當汗之證。與麻黃湯二三劑。汗不出者。此爲難治矣。

自汗

自汗者。衛爲邪干。不能固密。腠理疎而汗出。爲有表裏虛實之分。若惡風寒自汗出者。皆因太陽表證未解。冬用桂枝湯。餘月加減冲和湯。若汗後惡風寒。皆爲表虛。汗不止。黃芪建中湯。與夫太陽證發汗。遂漏不止。爲亡陽。朮附湯。若自汗出。不惡風寒。則爲表證罷而裏證實也。承氣湯下之。若小便自利汗出者。津

液少也。急下之。汗出而渴。小便難者。五苓散利之。後或汗出如油。貫珠不流。喘而不休者。衛氣絕矣。皆不治也。

頭汗

頭汗者。邪搏諸陽之經。則汗見於頭。至頸而還也。若遍身自汗出。謂之熱越。今熱不得越。而陽氣上騰。津液上湊。故汗出於頭。夫裏虛不可下。內澍不可汗。既頭有汗。不可再汗也。其或實熱在內。小便利而大便黑。爲蓄血。頭汗出者。輕則犀角地黃湯。重則桃仁承氣湯。選用熱入血室。有半表裏證。頭汗出者。小柴胡湯。發黃頭汗出。小便難。渴引水漿者。濕也。輕則茵陳五苓散。重則茵陳大黃湯。水結胸。心下怔忡。滿而微熱。頭汗。與其誤下濕家。額上汗出而喘。小便難。大便利者。亦陽脫也。

手足汗

手足汗者。手足乃諸陽之本。熱聚于胃腑。則津液傍達于四肢也。蘊熱則燥屎譫語。手足汗出者。大承氣湯下之。挾寒則水穀不分。手足汗出者。理中湯溫之。是有承氣理中之不同也。

盜汗

盜汗者。睡中則出。而醒則止矣。緣邪在半表半裏。故知膽有熱也。專主小柴胡爲當矣。

煩熱

煩熱者。不經汗吐下。則爲煩熱。與發熱有異也。經曰。病人煩熱。汗出則解。如未作膈實。但當和解微熱。而

已。若心下滿而煩，則有吐下之殊也。先煩而悸者爲實，先悸而煩者爲虛。虛謂心中欲嘔欲吐之貌。陽明病，心煩喜嘔，壯熱往來，心下悸，小便不利，小柴胡加茯苓湯發汗後解。半日許脈浮數者，可更發汗。桂枝湯汗後晝煩夜靜，不嘔渴，無表證，脈微沉，乾姜附子湯。大汗後六七日不大便，煩而不解，腹滿痛者，有燥屎也。大承氣湯下之，止汗下後，心下痞滿，氣上衝，頭身振搖而煩者，茯苓白朮湯爲要也。

煩燥

煩爲擾亂而煩，燥爲憤怒而燥。謂先煩漸生燥也。有陰陽虛實之別。心熱則煩，陽實陰虛，腎熱則燥。陰實陽虛，煩爲熱輕，燥爲熱重。所謂煩燥者，先發煩而漸至燥。所謂燥煩者，先發燥而復發煩也。太陽中風，不得汗，煩燥者，此邪在表而煩燥也。羌活沖和湯。大便不通六七日，遶臍痛，煩燥發作，有時而渴者，此爲燥屎。乃邪氣在裏而煩燥也。大承氣湯。太陽不得汗，醫以火劫取汗，火熱入胃，此劫令煩燥也。小柴胡加牡蠣湯。陽微發汗，燥不眠，與大下後復發汗，晝日不得眠，至夜安靜，身無熱，乾姜附子湯。汗下後病不解，煩燥者，茯苓四逆湯。俱謂陽虛煩燥也。又有不煩便作燥悶者，此爲陰盛拒陽也。欲於泥水井中臥，飲水不得入口者是也。四逆湯。其結胸煩燥悉具，及吐利四逆而煩燥，下利厥逆而煩燥，惡寒踈臥，脈不出而煩燥，皆爲不治也。

懊憹

懊憹者，鬱悶不舒之貌。蓋表證誤下，正氣內虛，陽邪內陷於心胸之間，重則爲結胸也。邪在心胸則宜吐。

熱結胃腑則宜下發汗吐下後虛煩不得眠懊者與夫短氣煩燥心下渴胸中懊者用梔子豉湯陽明病下後懊憹而煩胃中有燥屎承氣湯下之陽明無汗小便不利心懊憹者必發黃茵陳湯利之舌上白胎饑不食虛煩不眠頭汗出懊憹者梔子豉湯也

身體痛

身體痛者雖曰太陽表邪未解又有溫經發汗不同如發熱惡寒頭疼身體痛脈浮緊者表未解也冬月麻黃湯餘月羌活沖和湯汗之或下利脈沉身痛如被杖者爲陰寒證宜四逆湯溫之發汗後身痛脈沉遲桂枝芍藥人參湯下利煩滿身疼痛先溫其裏四逆湯後攻其表桂枝湯一身盡痛發熱面黃七八日熱結在裏有瘀血也桃仁承氣湯下之如身重痛者屬陽明有風也葛根湯主治也

拘急

拘急者手足不能自如屈伸不便如倦臥惡風之貌四肢諸陽之本因發汗亡陽陽虛而有此證自汗脈浮小便數心煩惡寒足攣拳急芍藥甘草湯太陽病發汗遂漏不止惡風小便難拘急者桂枝加附子湯吐利後汗出發熱惡寒拘急手足厥冷者四逆湯溫之也

咳嗽

欬者俗呼爲嗽肺爲邪氣逆不下有肺寒而欬有停飲而欬有半表半裏而欬各治不同太陽病身熱欬嗽乾嘔微喘而利小青龍湯身涼咳嗽乾嘔微利心下滿引脇痛十棗湯四肢重痛腹疼下利欬嗽或嘔

真武湯。少陰病。欬嗽。四逆。腹痛。下利。或悸。四逆散。加五味子。乾姜。少陽病。往來寒熱。胸滿痛滿而欬。小柴胡湯。欬而嘔滿喘急。大半夏湯也。

喘

喘者。有邪在表而喘。有邪在裏而喘。有水氣而喘。在表者。心腹濡而不堅。外證無汗。法當汗之。在裏者。心腹脹滿。外證有汗。法當下之。水氣喘者。心下怔忡。青龍去麻黃加杏仁湯。太陽陽明合病。脈促有汗而喘者。葛根黃芩湯治之。經云。喘而汗出。宜利之。汗不出而喘。宜發之。其或直視譫語。汗出如油。喘而不休。死證也。

氣逆

氣逆者。氣自腹中時逆上衝也。因太陽病下之。表邪乘虛傳裏。裏不受邪。則氣逆上行。而邪在表也。當汗之。桂枝湯。不上衝者。勿與之。厥陽客熱上衝。此熱在裏而氣上也。大柴胡湯下之。病緩虛羸。少氣。氣逆上衝欲吐者。竹葉石膏湯。有動氣。因發汗而氣上。李根湯。二者皆正氣虛。而邪氣逆也。

短氣

短氣者。呼吸不相接續也。大抵心腹脹滿而短氣者。邪在裏而爲實。宜下之。承氣湯。心腹濡滿而短氣者。邪在表而爲虛也。宜解之。桂枝湯。食少飲多。水停心下。短氣者。小半夏湯。風濕相搏。汗出短氣。小便不利。惡風不欲去衣。邪氣在表。甘草附子湯。太陽證誤下之。短氣。懊憹煩燥爲結胸者。大陷胸湯治也。

口乾

口乾者邪熱聚胃消耗津液故少陰證口燥咽乾急下之口乾漱水不欲嚥者若見表證鼻衄爲邪熱在經緣陽明血氣俱多經中熱甚迫血妄行犀角地黃湯口乾身大熱背惡寒者人參白虎湯若無表證加之胸腹滿如狂者又爲畜血證桃仁承氣湯少陽口乾小柴胡和之也

渴

渴者裏有熱也津液爲熱所耗傷寒傳至厥陰爲消渴者謂飲水多而小便少乃熱能消水也脈浮而渴屬太陽小青龍去半夏加天花粉有汗而渴屬陽明人參白虎湯便實者宜當下之脈沉而渴屬少陰大承氣湯至於厥陰又熱之極矣俱當下之無疑矣太陽無汗喜渴忌白虎宜小柴胡湯陽明汗多而渴戒五苓散宜竹葉石膏湯先嘔後渴此爲欲解當與水解先渴後嘔爲水停心下赤茯苓湯小便不利而渴五苓散發黃頭汗出小水不利而渴者茵陳五苓散中暑脈虛身熱而渴者白虎湯爲要也

胸膈滿

胸膈滿者腹間氣塞滿悶也非心下滿脇滿者脇肋下脹滿也非腹中滿蓋證邪傳裏必先胸以至心腹入胃是以胸滿多帶表證宜微汗惟脇滿多帶半表半裏小柴胡加枳桔和之胸中痰實者湧之如胸中結實燥渴大便秘者下之大陷胸湯可也

結胸

結胸者。蓋太陽證自汗。當服桂枝湯。而誤用承氣下之。而成結胸。不按自痛。連臍腹邊手不可近者。大結胸。大陷胸湯。按之方痛。心下硬。小結胸。小陷胸湯。懊憹煩渴。心下痛者。熱結胸。少與大陷胸湯。懊憹滿悶。身無熱者。寒結胸。三物白湯。心下怔忡。頭汗出。無大熱。爲水結胸。小半夏茯苓湯。若未經下者。非結胸也。屬半表半裏證。宜小柴胡枳桔以和之。已經下者。爲結胸也。結胸脈浮大者。未可下。猶帶表證。若結胸證。煩燥悉具者。必死矣。

痞

痞者。因太陽證。當服麻黃湯。而誤用承氣下之。而成痞滿。此因虛邪留滯。若欲下之。必待表證罷而後可。宜小柴胡加枳桔湯。若惡寒汗出痞滿者。附子瀉心湯。服後小便不利者。五苓散。表未解。心下妨悶者。曰支結。柴胡桂枝湯。表未解而數下之。遂協熱而利。心下痞硬。爲表裏俱病。桂枝人參湯爲當也。

腹滿

腹滿者。邪入太陰脾土也。當痛爲裏實。須下之。承氣湯。時減者。爲裏虛。當溫之。理中湯。若表解內不消。非大滿。猶生寒熱。亦未可下。是邪全未入腑。若大滿大實堅。有燥屎。雖日數少。亦當下之。謂邪已入腑也。太陽證誤下。因時腹滿而痛。桂枝加芍藥湯。痛甚者。桂枝加大黃湯。陽明病發熱腹滿。微喘口乾。不大便。小柴胡湯。噦而小便難。加茯苓。三陽合病腹滿。身重難轉側。譫語口中不仁。小柴胡湯。太陰腹滿。吐食不可。枳實理中湯。少陰咽乾腹滿。不大便。急下之大承氣湯。下利腹滿。身痛。先溫其裏。四逆湯。後解其表。桂枝

湯汗後腹滿。當溫。厚朴半夏生姜人參湯。吐後腹滿。少與調胃承氣湯。下後腹滿。梔子豉湯。腹滿大抵陽熱爲邪。則腹滿而咽乾。陰寒爲邪。則腹滿而吐利。食不下。若曾經吐汗下後腹滿者。治各不同也。

腹痛

腹痛者。緣邪氣與正氣相搏。則爲腹痛。如陽邪傳裏而痛者。其痛不常。當以辛溫之劑和之。小建中湯。陰寒在內而腹痛者。則痛無休止時。嘗欲作利也。以熱劑溫之。附子理中湯。有燥屎宿食而痛者。則煩而大便秘。腹滿而硬痛也。大承氣下之。少陰下利清穀。脈欲絕。腹痛者。通脈四逆湯。兼小便利者。真武湯。實痛而關脈實者。桂枝大黃湯。經云。諸痛爲實。則痛隨利減之法也。

小腹痛

小腹痛者。臍下滿也。若胸滿。心下滿。腹中滿。皆爲邪氣而非物。今小腹痛。則爲有物而非氣。若小便利者。則爲蓄血之形。小便利。此乃溺澀之證。滲利之劑。宜分兩途。太陽病不解。熱結膀胱。其人如狂。小腹痛。滿結痛者。桃仁承氣湯。下盡黑物則愈。太陰身黃。脈沉。小腹痛。小水不利者。五苓散利之。小便青白爲愈。病人素有痞氣。連在臍傍。痛引入陰筋者。名臟結。死也。

嘔吐

嘔者。聲物俱有而旋出。吐者。無聲有物而頓出。有聲無物。爲乾嘔也。較之輕重。則嘔甚於吐矣。蓋表邪傳裏。裏氣上逆。則爲嘔也。大抵邪在半表半裏。則多嘔。及裏熱而嘔吐者。俱用小柴胡湯。故經云。嘔多雖有。

陽明證不可攻。攻之爲逆。若太陽少陽合病而嘔者。黃芩加半夏湯。太陽陽明合病當自利。若不利而嘔者。葛根半夏湯。三陽發熱而嘔。俱用小柴胡湯。先嘔後渴。此爲欲解。當與水解。先渴後嘔。爲水停心下。赤茯苓湯。若陽明證發熱汗出。心煩痞硬。下利嘔吐。大柴胡湯。若胃冷脈沉遲不食。小便利者。半夏理中湯加姜汁。利而見厥逆者難治。以其虛寒之甚也。

乾嘔

乾嘔者。空嘔而無物出也。大抵熱在胃脘與穀氣併。熱氣上薰。心下痞結。則有此證。太陽汗出乾嘔。桂枝湯主自汗也。少陰下利乾嘔。姜附湯主下利也。厥陰吐涎沫乾嘔。吳茱萸湯主涎沫也。邪去嘔自止。又有水氣二證。太陽表不解。心下有水氣。身熱乾嘔者。微喘或自利。小青龍湯。不發熱。只惡寒。脇痛欬而利。乾嘔者。亦水氣也。十棗湯。膈上有寒飲。乾嘔者。屬少陰。四逆湯也。

噦

噦卽乾嘔之甚者。非比乾嘔。則有聲濁惡而長。皆有聲而無物也。蓋因胃氣本虛。因汗下太過。或恣飲冷水。水寒相搏。虛逆而成也。又有熱氣擁鬱。上下不得通而噦者。輕則和解疎利。重則溫散。噦而腹滿。大便秘。先用半夏生姜湯。次用小承氣。小便利者。猪苓湯。噦不止者。乾姜橘皮湯。溫病有熱。暴飲冷水作噦。茅根乾葛湯。噦家若不尿而噦者。則病篤矣。

欬逆

欬逆者俗謂乞忒是也。纔發聲於咽喉則遽止。軋然連續數聲。然而短促不長。古謂之噦。非也。噦與乾嘔無異。但其聲濁惡而長。比之乞忒。大有逕庭矣。若將乞忒案爲噦與欬逆。誤人多矣。若便實脈本有力者。少與承氣湯微利之。因當下失下。熱氣入口于肺故耳。若便軟脈來無力。瀉心湯因胃氣而衝逆故耳。脈散者難也。

下利

下利者。傷寒下利多噴於熱。熱邪傳裏。裏虛協熱。亦爲下利。三陽下利身熱。太陰下利手足溫。少陰厥陰下利身涼無熱。此其大槩耳。夫自利清穀不渴。小便色白。微寒厥冷惡寒。脈沉遲無力。此皆寒證也。若渴欲飲水。溺色如常。泄下黃赤。發熱後重。此皆熱證也。寒者理中四逆湯。熱者小柴胡猪苓湯。寒因直中陰經。熱因風邪入胃。水來傷土。故令暴下。或溫或攻。或固下焦。或利小便。隨證施治。但不宜發汗耳。若汗之。便邪氣內攻。復泄其津液。胃氣轉虛。必成脹滿也。太陽陽明合病下利。葛根湯。太陽少陽合病下利。乾嘔脈實者。承氣湯。太陽表未解。數下之。遂協熱利。心下痞者。桂枝人參湯。太陰自利不渴。與夫厥逆無脈而利者。四逆湯。少陰咽痛下利。胸滿心煩者。豬膚甘桔湯。渴而自利。純清水。心下硬痛。口乾燥者。此不可溫。急用大承氣湯下之。無疑矣。傷寒續得下利清穀。身疼痛者。急當救裏。四逆湯。清便自調。急當救表。桂枝湯。下利譫語。脈沉有力。爲有燥屎。急當下之。大承氣湯。腸鳴腹痛下利。脈沉遲無力。急當溫之。小建中湯。寒毒下利而戴陽者。下虛也。附子理中湯。若夫下利譫語目直視。下利厥冷燥不眠。下利發熱厥而自汗。

下利厥冷無脈。灸之不溫。脈不至者。下利一日十數行。脈反實者。皆爲不治也。

熱入血室

熱入血室者。衝脈爲血之海。卽血室也。男女均有此血氣。亦均有此衝脈。得熱血必妄行。在男子則爲下血。譫語。因邪熱傳入正陽明腑。在婦人則爲寒熱似瘧。邪乃隨經而入。皆爲熱入血室。太陽不解。熱結膀胱。其人如狂。而血自下者愈。用桂枝湯。陽明下血。譫語。胸滿如結胸。夜則如見鬼。此爲熱入血室。小柴胡湯。下焦蓄血。其人如狂。小腹急結。小便自利。大便黑。與夫下利無表裏證。脈數不解。消穀易飢。多日不大便。此爲瘀血。桃仁承氣湯。少陰病下利膿血。或腹滿如魚腦者。桃花湯主之。

四逆

四逆者。手足厥冷不溫。謂之四逆。邪在表則手足熱。邪在半表裏則手足溫。至於邪傳少陰。則手足冷逆也。然自熱而致溫。由溫而致厥。乃傳經之邪。輕則四逆散。重則承氣湯下之。若初起得病。使厥者。輕則理中湯。重則四逆湯溫之。此爲陰經受邪。乃陽不足而陰有餘也。若或惡寒厥逆。踈臥煩燥。吐利而脈不至者。皆惡候也。

不大便

不大便者。因發汗利小便過多。耗損津液。以致腸胃乾燥。蓋邪熱傳入正陽明。裏證最多。惟見發渴譫語。脈實狂妄。潮熱自汗。小水赤。或心腹脹滿硬痛。急用三承氣湯。選而下之。大便通而熱愈矣。倘脈浮表證。

尚在。或帶嘔者。知邪未全入腑。尤在半表裏間。尙用小柴胡和之。候大便硬實。不得不下者。只得以大柴胡下之。若陽明汗多。或已經發汗。利小便。而大便不通者。此津液枯竭。宜蜜導通之。

譫語

譫語者。經云。邪氣盛則實。精氣奪則虛。故實則譫語。虛則鄭聲。胃中實熱。上乘於心。心爲熱冒。則神識昏迷。妄有所見而言也。輕則睡中呢喃。重則不睡亦語。有譫語者。有獨語者。有語言不休者。有言亂者。此數者。見其熱之輕重也。大抵熱入於胃。水涸糞燥。必發譫語。爲實也。有被火劫取汗。而譫語者。有妄言譫語者。有下利清穀。不渴譫語者。此爲虛也。或脈來沉實。洪數有力。大便不通。小水赤燥。渴譫語狂妄。腹中脹滿。硬痛。或潮熱自汗。或下利純清水。心腹硬痛者。皆裏證。邪熱燥屎也。俱大承氣下之。下後利不止。與夫喘滿氣逆而上奔。自利氣脫而下奪。皆爲逆也。其三陽合病。身重脈實。難轉。口中和。面垢遺尿。白虎湯。或大便結。大熱。乾嘔。錯語。呻吟不眠。犀角解毒湯。初得病。無熱狂言。煩燥不安。精采不與人相當。與五苓散三錢。以新汲水探吐。一法用桂苓湯。狂言漱水。不欲嚥。大便黑。小水不利。身黃脹滿。此因當下失下。是瘀血譫語。桃仁承氣下盡黑物則愈。婦人經水適來適斷。續得寒熱。此爲熱入血室。譫語。小柴胡湯。陽明證喜忘如狂者。亦瘀血也。照前桃仁承氣下盡黑物則愈矣。

鄭聲

鄭聲者。如鄭衛之音。轉不正也。蓋汗下後。若病久本音失。而正氣虛。則語散不知高下。乃精氣奪之候。其

脈微細。大小便自利。小柴胡湯也。

小便不通

小便不利者。邪氣聚於下焦。結而不散。甚則小腹硬滿而痛。此小便不通也。大抵有所不利者。行之取其滲利也。若引飲過多。下焦多熱。或中濕發黃。水飲停滯。皆以利小便爲先。惟汗後亡津液。胃中乾。與陽明汗多者。則以利小便爲戒。設或小水不利。而見頭汗出者。乃陽脫關格之病篤矣。引飲過多。小便不利。下焦蓄熱。脈浮者。五苓散。沉脈猪苓湯。太陽病身黃脈沉。下腹硬。小水不利者。知無血也。與陽明無汗。小便不利。心中懊憹者。必發黃。茵陳五苓散。黃自退而小便清矣。

小便難

小便難者。陰虛也。陽必溲之。由膀胱受熱。故小便赤澀而不能流利也。又有雖不大便五六日。而小便少者。但初硬後溏不定。或硬攻之必溏。候小便多尿定硬。方可攻之。乃胃中水穀少。便雖通而不多。如猪苓湯可也。

小便自利

小便自利者。爲津液偏滲。大便必硬。宜藥下之。太陰當發身黃。其小便自利者。則濕熱內泄。不能發黃。惟血證小腹急而如狂。小水自利者。腎與膀胱虛而不能約制水液。桃仁承氣下之。若自汗小便數者。雖有表證。不可用桂枝。謂其走津液也。若誤服之得厥者。以甘草乾姜爲治也。

舌月

舌上白胎者。以丹田有熱。胸中有寒。謂其寒邪初傳入裏也。小柴胡湯。舌乃心之苗。色應南方。火邪在表。則未生胎。邪入裏。津液結搏。則舌上生胎而滑。熱氣漸深。其舌胎燥而澀。熱聚于胃。其胎爲之黃矣。宜承氣湯下之。若舌上黑色胎者。則熱已深。病勢已篤。經曰。熱病口中乾舌黑者。乃腎水刑於心火也。脈浮陰陽俱緊。口中氣出。舌中乾燥。蹠臥足冷。鼻中涕出。舌上滑胎。勿妄治也。到七八日以來。微發熱。手足溫者。此爲欲解也。及或大發熱者。難治。設有惡寒者。小柴胡加乾姜服之。

臍結

臍結者。臍氣閉結而不復流布也。外證如結胸狀。但欲食腹滿如故。下利舌上白胎者爲異。其脈寸浮關沉緊。痛引陰筋。臍腹脹痛者。難治也。

咽痛

咽喉不利而痛。或成瘡不納穀食。皆邪熱毒氣上衝而痛。甘桔苦酒湯。咽喉不利。吐膿血。手足厥冷不止者。難治。升麻六物湯主之。

頭眩

頭眩者。少陽半表裏之間。表邪傳裏。表中陽虛故頭眩。又有汗下後而眩冒者。亦陽虛所致。少陰下利止時頭眩。時時自冒。此虛極而脫也。太陽病若下之。因復發汗。以此表裏俱虛。其人必冒。胃家汗自出而愈。

陽明病頭眩。不惡寒。能食而飲。茯苓白朮甘草生薑湯。少陽證目眩。小柴胡湯。太陽病發汗後。汗出不解。心下悸。頭眩。身憊。筋惕振擗地者。真武湯。吐汗下後。虛而脈沉數。心下痞。腸痛。氣衝咽喉。不得息。身振搖。筋肉惕。久則成痿。茯苓白朮桂枝甘草湯是也。

鼻衄

鼻衄者。經絡熱盛。迫血妄行於鼻者爲衄也。是雖熱盛。邪猶在經。然亦不可發汗。經曰。以桂枝麻黃治衄。非治衄也。乃欲散經中邪氣耳。其衄血固欲解。若衄不止。而頭面汗出。其身無汗。及發汗不至足者。難治。太陽證衄血。及服桂枝湯後。致衄者。爲欲解。犀角地黃湯。無汗而衄。脈浮緊。再與麻黃湯。有汗而衄。脈浮緩。再與桂枝湯。節菴曰。此二者。蓋爲脈浮而設也。若衄而成流者。不須服藥。少刻自解。若點滴不成流者。必用服藥無疑。經曰。奪血者無汗。奪汗者無血。俗人以血爲紅汗。厥有旨哉。衄家不可大汗。汗之必額上陷。脈緊急。目直視。不能盼。不眠。芍藥地黃湯。陽明漱水不欲嚥。犀角地黃湯。衄而煩渴欲水。水入卽吐。先服五苓散。次服竹葉石膏湯。若少陰但厥無汗。強發之。必動其血。或從口鼻耳目中出。名下厥上竭。爲難治。當歸四逆湯是也。

吐血

吐血者。諸陽受熱。其邪在表。當汗不汗。致使熱毒入臟。積蓄於內。遂成吐血。凡見眼閉目紅。神昏語短。眩冒迷忘。煩燥漱水。驚狂譫語。鼻衄唾紅。背冷足寒。四肢厥逆。胸腹急滿。大便黑。小便數。皆瘀血證也。雖有

多般不必悉具。但見一二便作血證。主張初得此證。急宜治之。服桂枝湯。吐者其後必吐膿血。犀角地黃湯。血熱者。黃連阿膠湯也。

心悸

心悸者。築築然動。怔怔忡忡。不能自安是也。有氣虛。有停飲。其氣虛者。陽氣內弱。心中空虛而爲悸。人有汗下後。正氣虛而亦悸。與氣虛而悸又甚。皆須定治其氣也。其停飲者。由飲水過多。水停心下。心火惡水。不能自安。雖有餘邪。必先治悸與水也。如小便利而悸者。茯苓桂枝白朮湯。小便少者。必裏急。猪苓湯爲要也。

發黃

發黃者。濕熱交併。民多病瘧者。單陽而無陰也。太陰脾土濕熱所蒸。色見於外。必發黃。濕氣勝。則如薰黃。而晦。熱氣勝。則如橘黃而明。傷寒發黃。熱勢已極。且與蓄血大抵相類。但小便利。大便實者。爲發黃。輕則五苓散。重則茵陳湯。小便利。大便黑者。爲蓄血。輕則犀角地黃湯。重則桃仁承氣湯。濕家爲病。一身盡痛。發熱。身如薰黃。小便利者。五苓散。小便利。無黃者。朮附湯。身煩疼者。麻黃湯加蒼朮。若夫形如烟煤。搖頭直視。環口黎黑。舉體發黃者。此皆眞臟絕也。

發斑

發斑者。大熱則傷血。熱不散。裏實表虛。熱乘虛出於皮膚而爲斑也。輕則如疹子。甚則如錦紋。或本屬陽。

誤投熱藥。或當汗不汗。當下不下。或汗下未解。皆能致此。有兩證。一曰溫毒。即冬時觸寒。至春而發。汗下不解。邪氣不散。故發斑也。一曰熱病。即冬時溫暖。感乖厲氣。遇春暄熱而發也。慎不可發汗。若汗之。重令開泄。更增斑爛也。然而斑之方萌。與蚊迹相類。發斑多見於胸腹。蚊迹只見於手足。陽脈洪大。病人昏憤。先紅後赤者。斑也。脈不洪大。病人自靜。先紅後黃者。蚊跡也。其或大便自利。或短氣。燥屎不通。黑斑如菓實。醫者。盧醫不能施其巧矣。凡汗下不解。足冷耳聾。煩悶欬嘔。便是發斑之候。溫毒發斑。咳而心悶。下利嘔吐。下部并口有瘡者。黃連橘皮湯。陽毒斑如錦紋。面赤咽痛。脈洪大。不知人者。三黃石膏湯。便實燥渴者。調胃承氣下之。發斑通用升麻犀角湯。熱多者。玄參升麻黃連一物湯治也。

發狂

發狂者。重陽而狂。熱毒所深併入於心。遂使神不寧。志不定。始得少臥不餓。譫語妄笑。甚則登高而歌。棄衣而走。踰垣上屋。罵詈不避親疎。皆獨陽亢盛。不大下之。何能止也。若因當汗不汗。瘀熱在裏。下焦蓄血如狂者。小便必自利。大便黑。雖時如狂。未至於狂耳。須桃仁承氣下之。重陽即陽毒。脈洪大。面赤咽痛。潮熱發斑如錦紋。或下利黃赤。陽毒升麻湯不効者。三黃石膏湯。大便實者。調胃承氣湯下之。太陽病不解。熱結膀胱。其人如狂。而血下者愈。若外不解。與桂枝湯。外已解。但小腹急結。與夫脈沉。身黃唇燥。漱水小水自利者。亦是血證如狂。輕則犀角地黃湯。重則桃仁承氣下之。若狂言直視。便溺自遺。與汗後大熱。脈燥狂言。不能食。此爲虛也。

肉瞤筋惕

肉瞤筋惕者。非常常有之。陽氣者。精則養神。柔則養筋。發汗過多。津液涸少。陽氣偏枯。筋肉失所養。故惕惕然動。瞤瞤然跳也。非溫經助陽之藥。何有愈乎。故設真武湯以救之。因汗吐下後。表裏俱虛。有此證者。逆之甚也。

拂鬱

拂鬱者。乃陽氣蒸越。形於頭而體膚之間。聚而不散也。其證有分別。如大便硬而氣短燥渴者。實也。大柴胡汗下後有此證。飲水而嘔者。胃虛也。桂枝人參湯加茯苓。初得病發汗不徹。併於陽明。續自微汗出。面色赤者。陽氣拂鬱也。解肌湯。或汗不徹。其脈浮緊者。與麻黃湯。或小便不利。時有微熱。大便乍難。拂鬱不得臥。此有燥屎作實也。承氣湯下之是也。

瘥後昏沉

瘥後昏沉。或半月以來。或十餘日。終不惺惺。錯語少神。或寒熱似瘧。或潮熱。此因發汗不盡。餘熱在心胞絡間故也。知母麻黃湯微汗之。若胃口有熱。虛煩而嘔者。竹葉石膏湯加生姜治也。

勞復食復

病新瘥後。因勞動再發。爲勞復。緣其血氣未平。餘熱未盡。一或勞之。熱氣遂還于經絡。而復發也。小柴胡湯加減治之。表者汗之。裏者下之。病新瘥後。而多食復發者。爲食復。緣土虛不能勝穀氣。如水浸墻壁。水

退土尚未堅合其損穀則愈輕則消化重則吐下如關脈實大熱燥渴譫語腹痛大便實急下之不可緩也。

動氣

動氣者臟氣不調。築築然跳動。隨所主而形見於臍之左右上下也。其人先有痞氣而後感於傷寒。醫人不知患有痞積在內。妄施汗下吐法。致動其氣。故曰動氣。凡汗吐下。豈可輕舉之乎。可見傷寒所以看外證爲當者。蓋不在脈之可見。必待問證之可得。又有真氣內虛。水結不散。氣與之搏。卽發奔豚。以其走痛衝突如奔豚。皆不宜汗下。通用理中去白朮加桂。緣白朮燥翳閉氣。故去之。桂能泄奔豚。故加之。然而獨不言當臍有動氣者。脾爲中州。以行津液。妄施汗下。必先動脾氣。是以不言而喻也。左右上下尙不宜汗下。何況中州之氣。豈敢輕動之乎。

傷寒霍亂

霍亂者上吐下利。揮霍擾亂也。及邪氣飲食所傷。邪在中焦。既吐且利。邪在上焦。吐而不利。邪在下焦。利而不吐。俱用正氣散加半夏生姜汁治之。如吐利不止者。理中湯如其上下不通。腹痛甚而頭疼發熱者。桂枝大黃湯。此爲乾霍亂。死者多因其所傷之邪不得出。擁塞正氣。陰陽隔絕。先用吐法也。

不仁

不仁者。謂不柔和。痛癢不知。針火不知是也。諸虛乘寒。爲鬱冒不仁。血氣虛弱。不能周流於一身。於是正

氣爲邪氣所伏。故肢體頑麻不仁。厥如死屍。用桂麻各半湯。不愈者。補中益氣湯入姜汁。設或身體如油汗不休。喘而直視。水漿不入者。此爲命絕也。

陰陽易

陰陽易者。如換易之易。以其邪毒之氣。而交相易換也。男子病新瘥。婦人與之交。動淫慾而反得病者。婦人病新瘥。男子與之交。動淫慾而反得病者。其候身重氣乏。小便絞痛。頭不能舉。足不能移。四肢拘急。百節解散。眼中生花。熱氣衝胸。在男子則陰腫。入小腹攻刺。在婦人則裏急。連腰膂重。引腹內痛。若手足攣拳。其脈離經者。皆不治也。其不因易而自病復發。爲之女勞復。通用逍遙散之加減治也。

不眠

不得眠者。陽盛陰虛。則晝夜不得眠。蓋夜以陰爲主。陰氣盛。則目閉而臥安。若爲陽所勝。故終夜煩擾而不得寧。所謂陰虛則與夜爭也。汗出鼻乾。不得臥者。邪在表。乾葛解肌湯。若胃有燥屎。大熱錯語。及大汗胃中乾。不得眠者。邪在裏也。用大承氣下之。胃不和。則臥不安。故宜微熱和胃也。若汗下後。虛煩不得眠。梔子豉湯。咳而嘔。心煩悶不眠者。水氣也。猪苓湯。下後復熱。晝日煩燥。夜則安靜。無大熱者。乾姜附子湯。吐下後。心中懊憹不眠者。梔子豉湯。陽勝陰狂。言不眠。亂夢心煩。乏氣者。酸棗湯。陰勝陽則驚悸。昏沉大熱乾嘔。錯語。呻吟不眠者。犀角地黄湯治之。汗出脈虛不眠者。小建中湯主也。

多眠

夫衛氣者。晝則行陽。夜則行陰。行陽則寤。行陰則寐。陽氣虛。陰氣盛。則目瞑。故多眠。乃邪傳于陰。而不在陽也。昏昏閉目者。陰自闔也。默默不言者。陰至靜也。太陽病十餘日。脈浮細。嗜臥者。外已解。神將復也。設胸滿脇痛。鼻乾不眠者。風熱內攻。不干乎表。故熱氣伏於裏。則喜睡。不得汗者。小柴胡湯。脈浮者。羌活沖和湯。冬用麻黃湯。少陰病。但欲寐。尺寸俱沉細者。四逆湯。少陰病。欲吐不吐。欲嘔不嘔。心煩多寐五六日。自利而渴。小便白者。四逆湯。若復煩熱不得臥者。不治。二陽合病。欲眠目合。則汗譫語者。則有熱也。小柴胡湯。其胃熱者。亦臥也。犀角解毒湯。風溫狐惑。亦有此證。開在後條。

狐惑

狐惑者。猶豫不決進退之義也。有濕。唇皆虫證。腹中有熱。食入無多。腸胃空虛。三虫求食。而食入五臟。其候四肢沉重。惡聞食氣。默默欲眠。目閉舌白齒晦。面目間赤白黑色。變易無常。虫食下部爲狐。下脣有瘡。其咽乾。虫食臟爲惑。其聲啞。二者通用黃連犀角地黃湯加桃仁。越人望而畏之。厥陰消渴。氣上衝心。飢不欲食。食即吐蚘。既曰胃寒。復有消渴。蓋熱在上焦。而中下焦則但寒而無熱。又有大便實證。並用理中湯加大黃蜜少許微利之。

百合

百合者。百脈一宗。舉皆受病。所謂無復經絡傳次也。大病虛勞之後。臟腑不平。變成此證。似寒無寒。似熱無熱。欲食不食。欲坐不坐。欲行不行。口苦便赤。藥入即吐利。其脈微數。每尿則頭痛者。六十日愈。不頭痛。

但漸然惡寒者四十日愈。若尿快然頭眩者二十日愈。俱用百合知母地黃湯也。

蚘厥

蚘厥者厥陰病人素有寒。妄發其汗。或汗後身熱。以致胃中虛冷。飢不能食。食即吐蚘。乍靜乍煩。蚘或上或止。蚘聞食即出也。治法在前。

傷風見寒傷寒見風

熱盛而煩。手足自溫。脈浮而緊。此傷風見寒也。不煩少熱。四肢微厥。脈浮而緩。此傷寒見風也。二者爲榮衛俱病。法雖用大青龍湯。此湯峻險。不可輕用。須風寒俱盛。又加煩燥。方可與之。不若羌活沖和湯爲神藥也。

瘧

瘧者先太陽中風。重感於寒。無汗爲剛瘧。中風重感於濕。有汗爲柔瘧。俱身熱足寒。頸項強急。惡寒。頭面赤。目脈赤。獨頭搖。卒口噤。背反張。手足攣搐。皆瘧病也。傷風頭痛。常自汗出而嘔。若汗之必發瘧。大發濕家汗。亦作瘧。新瘧血虛。汗出當風。亦成瘧。若脈沉而遲。或緊或散。于指外者。皆死證也。有汗加減沖和湯。無汗者羌活沖和湯。口噤咬牙者大承氣湯下之。

瘕瘕

瘕瘕者瘕則急而縮。瘕則緩而伸。熱則生風。風主乎動。故筋脈相引而伸縮。傷寒至此證。可謂死矣。能以

去風滌熱之劑。間有生者。是其幸也。治法瘧病同。

風溫

風溫尺寸俱浮。素傷于風。因時傷熱。風與熱搏。卽爲風溫。其外證四肢不收。身熱自汗。頭疼喘息。發渴昏睡。或體重不仁。慎不可汗。汗之則譫語燥擾。目亂無睛光。病在少陰厥陰二經。萎蕤湯小柴胡選用。未醒者柴胡桂枝湯。發汗復身灼熱。知母葛根湯。渴者瓜蒌根湯。脈浮身重。防己湯。誤汗風溫。防己黃芪湯也。

濕溫

濕溫寸濡而弱。尺小而急。素傷于濕。因時中暑。濕與熱搏。卽爲濕溫。其狀胸腹滿。目痛壯熱。妄言自汗。兩脛疼倦怠。惡寒。若發其汗。使人不能言。耳聾。不知痛處。其身青。面色變。是醫殺人。且濕溫在太陰。蒼朮白虎湯加桂。濕氣勝。一身盡痛。發熱身黃。小便不利。大便盡快。五苓散加茵陳。臟虛自利。附子理中湯也。

風濕

風濕脈浮。先傷濕而後傷風也。其證肢體腫痛。不能轉側。額上微汗。惡寒不欲去衣。大便難。小便利。熱至日晡而劇。治法但微解肌。若正發汗。則風去濕在。非徒無益。而又害之。羌活沖和湯。咽乾小便不利者。五苓散。外不熱。內不渴。小便利。朮附湯。緩弱昏迷。腹滿身重。自汗失音。下利不禁。白虎湯加白朮。甘草。身腫痛。微喘。惡風。杏仁湯。熱而煩渴者。小柴胡加天花粉。若誤下之。小便必不利。五苓散。中濕小便不利。一身盡痛。身黃。大便秘。茵陳五苓散。大小便俱利。無黃者。朮附湯。身痛鼻塞。小建中湯加黃芩也。

溫毒中喝

溫毒者。冬月感寒毒異氣。至春始發也。表證未罷。毒氣未散。故有發斑之候。心下煩悶。嘔吐咳嗽。後必不利。寸脈洪數。尺脈實大。爲病則重。以陽氣盛故耳。通用玄參升麻湯也。

中暑脈虛而伏。身熱面垢。自汗煩燥。大渴。毛聳。背惡寒。昏倦。身不痛。與傷寒諸證。大不同矣。內外俱熱。口燥煩渴。四肢微冷而不痛。用白虎湯。痰逆惡寒。橘皮湯。熱悶不惡寒。竹葉石膏湯。頭痛惡心煩燥。五苓散。中暑用小柴胡加香薷最良。脈遲。洒然毛聳。口齒燥。人參白虎湯。霍亂煩燥。大渴腹痛。厥冷轉筋。黃連香薷湯治爲要也。須頓冷服之。如熱服反爲吐瀉矣。

戰慄

戰慄者。陰陽相爭。故身爲之戰搖也。邪與正氣外爭爲戰。內與正氣爭爲慄。正勝邪得汗而解。邪勝正遂成寒證矣。在表者。羌活冲和湯。在內者。人參理中湯。此陰經目中之眞寒者用之。傳經戰慄者。大柴胡湯治之是也。

